

DIŽA' GÜEN DAN' BZOJ SAN MARCOS

*Juan ben' bzoa beņe' nis gwdixjue'ede' diža' güen
che Diosen' latje daš*

(Mt. 3:1-12; Lc. 3:1-9, 15-17; Jn. 1:19-28)

¹ Qui goc cate' gwxe xtiža' Jesucristo ben' nac dogualje Xi'in Dios.

² Da' Isaías ben' be' xtiža' Diosen' cani' bzoje' da' nga, žan:

Chselā' to beņe' cuiagalgüe' laogun' güe'e xtižon',
cont ba zjanita' beņe' yosozenague' čhio' cate' šejo'.

³ Beņa' chņe' zižje latje dašen' že':

“Le gonšagüe' yichjlažda'olen' cont gwzenagle che
Xanchon' cate' yide';

le cuejyichj da' malen' chonle cont yichjlažda'olen'
gaquen ca to nez da' ba gosonšagüe'.”

⁴ Ca' goquen', Juan ben' chzoa beņe' nis bžine'
latje dašen' na' gože' beņe' ca' besežag na' cheyała'
yesyetinjde' xtoła'gaque' na' yesezoe' nis cont nitlao
xtoła'gaque'.

⁵ Zan beņe' za'ac do distritw Judea na'
ciuda Jerusalén bosozenague' che diža' dan'
chyixjue'ede'. Na' cate' gosexoadole' bi da' xinj
zjanone', Juanna' bzoje' legaque' nis lo' yegw Jordán.

⁶ Xalana' Juanna' goquen de yiša' xa camello na'
da' bchej lsine' goquen de yid, na' gwdagüe' biše'zo
len šina' beser yiže'.

⁷ Na' gwdixjue'ede' beņe' xtiža' Diosen', gwne':

—Coža' na' za' za' to bene' zaca'che' ca neda', na' da' nacchgüe' bene' zaca', bi zaca' gona' xmandadoe' lechja' no xe'le'.

⁸ Neda' ba bzoa' le'e nis, perw ben' za' zan' gone' cont soa Spiritw che Diosen' lo' yichjlažda' olen' nabian' xbab chele.

Jesúsen' gwzoe' nis

(Mt. 3:13-17; Lc. 3:21-22)

⁹ Ca tiempa' Jesúsen' gwze'e lagüe yež Nazaret da' chi' ga mbane distritw Galilea, na' Juanna' bzoa' le' nis lo' yegw Jordán.

¹⁰ Na' šlac chechoj Jesúsen' lo' nisen', Jesúsen' ble'ede' byaljw yaban' gan' zoa Diosen', na' Spiritw che Diosen' betjen jasoan len le', na' ca hora' Spiriton' naquen ca nac ngolbex.

¹¹ Na' gosende' gwne Dios ben' zoa yaba gwne':

—Len' naco' Xi'ina' bene' chacchgüeda', na' chebe chezaque'laže'chgüeda' chio'.

Satanásen' goclažen' co'oyelan' Jesúsen' cont gone' da' mal

(Mt. 4:1-11; Lc. 4:1-13)

¹² Nach Spiritw che Diosen' benen cont la' gwyete Jesúsen' latje daš.

¹³ Na' gwzoe' latje dašen' choa ža ladjo be znia ca'. Na' Satanás dan' chnabia' da' xigüe' ca' goclažen' co'oyelan' le' cont gone' da' mal. Nach beyoža' jasaclen angl che Diosen' le'.

Jesúsen' gwzolao chyixjue'ede' xtiža' Diosen' distritw gan' nzi' Galilea

(Mt. 4:12-17; Lc. 4:14-15)

14 Beyož gosegüe'e Juanna' ližya, Jesús'en' beze'e beyeje' Galilea gan' jatixjue'ede' diža' güen, gwne' Diosen' nabi'e yichjlaždao' beņe' ca' yosozenag che'.

15 Jesús'en' gwne':

—Ba bžin ža cate' Diosen' nabi'e yichjlaždao' beņe' yosozenagüe' che'. Le yetinje xtoła'len' na' le šejle' diža' güen che Diosen' da' chyixjue'eda'.

Jesús'en' goxe' tap beņe' gwxen bel šja'aclene' le' txen

(Mt. 4:18-22; Lc. 5:1-11)

16 Jesús'en' chde' do cho'a nisdao' che Galilean' cate' ble'ede' chope beņe' gwxen bel, Simón na' beņe' biše' Andrés. Na' zjanite' chosozale' yixjw dan' chesezende' belen' lo' nisa'.

17 Na' gož Jesús'en' legaque':

—Le šo'o len neda'. Nacle beņe' gwxen bel na' chbejle belen' lo' nisen', perw na'a gona' cont gaxle beņe' yesyechoje' lo da' malen'.

18 Nach la' bosocua'ante yixjw chen' na' jasa'aclene' le'.

19 Na' Jesús'en' gwze'e yelate' na' ble'ede' Jacobon' xi'in Zebedeo na' len beņe' biše' Juan, zjajo'e lo' barcw chesyeyonšagüe' yixjw chegaquen'.

20 Na' Jesús'en' lecze goxe' legaque' šja'aclene' le' na' bosocua'ane' Zebedeon' ben' nac xagaque lo' barcon' len beņe' ca' chesaclen le', nach ja'aque' len Jesús'en'.

To beņe' gwyo'o gwyaze' da' xigüen'
(Lc. 4:31-37)

21 Besežine' yež da' nzi' Capernaum, na' ža che Dios Jesúsen' gwyo'e lo' yodao' da' zoa na' na' gw-zolagüe' bsed blo'ede'.

22 Bene' ca' že' na' besyebande' can' bsed blo'ede', le can' bzejni'iden' nachbia' nezde' cayanen' nac xbab che Diosen', gague bzejni'ide' can' chosozejni'i ben' chosolo'e ley dan' bzoj da' Moisés.

23 Na' lo' yodaon' zoa to bene' yo'o nyaze' da' xigüen', na' bosye'e gwne':

24 —¿Bixchen' chgoša' chlaže' chio' len neto', Jesús bene' Nazaret? ¿Zedežiayo'o neto'? Neda' nombi'a le' na' nezda' naco' bene' laždao' xilaže' juisyw bene' gwseļa' Dios.

25 Nach Jesúsen' gože' da' xigüen':

—iŠšago', bechoj lo' yichjlaždao' bengal

26 Na' da' xigüen' benen cont gwchole bena', nach chosya'adiachguan bechojen lo' yichjlažda'ogüen'.

27 Yogo' bene' ca' že' na' besyebande' na' gose' lježe':

—¿Bixen' chac? ¿Bixe da' coben' chlo'e bengal
iNachbia' nape' yela' chnabia' na' yela' guac, le da' xigüe' ca' chesonen da' že'!

28 Na' ca' nac dan' ben Jesúsen' bedao'nez gos gwlalje dižan' doxen lagüe yež ca' gan' mbane Galilea.

Jesúsen' beyone' taobi'in che Simón Pedro

(Mt. 8:14-15; Lc. 4:38-39)

29 Cate' besyechoje' lo' yodaon', Jesúsen' len Jacobo na' len Juan ja'aque' liž Simón na' Andrés.

30 Na' taobi'in che Simónna' die' che'ede' xla; na' gose'e Jesúsen':

—Benga die' che'ede'.

31 Nach jabiga' Jesúsen' na' be \underline{x} ue' taquen' gw \underline{l} ise'ne'. Na' \underline{l} a' beyactede', nach bs \underline{i} ni'e da' gose'ej gosagüe'.

Jesúsen' beyone' zan be \underline{n} e' chese'ede'

(Mt. 8:16-17; Lc. 4:40-41)

32 Cate' ba gw \underline{x} oa gwbižen' na' ba gw \underline{x} in, jas-
esane' lao Jesúsen' zan be \underline{n} e' chese'ede' na' be \underline{n} e'
zjayo'o zjanyaze' da' \underline{x} igüen'.

33 Na' do yež be \underline{n} e' besedop besežague' cho'a yo'o
gan' zoa Jesúsen'.

34 Na' Jesúsen' beyone' be \underline{n} e' chese'ede' gwde
gwdele yižgüe' na' bebeje' zan da' \underline{x} igüe' da' zjayo'o
zjanyaz be \underline{n} e', perw bitw bi'e latje bi yesenan, \underline{l} e
legaquen zjanezen non' nac \underline{l} e'.

Jesúsen' chyixjue'ede' xtiža' Diosen' Galilea

(Lc. 4:42-44)

35 Šba \underline{l} cate' \underline{n} e' nac \underline{c} holjesúsen' gw \underline{y} ase' na'
gwze'e gwyeje' ga nono n \underline{l} a' na' bo \underline{l} güiže' Diosen'.

36 Simón na' be \underline{n} e' \underline{l} ježe' ca' ja'aque'
jasyediljue'ne'.

37 Na' cate' besyeželde'ne' gose'ene':

—Yogo'ze be \underline{n} e' chesyeyiljue' le'.

38 Perw Jesúsen' gože'ne':

— \underline{L} e šo'o ga yoble ga nac ga \underline{l} a'ze cont \underline{l} ecze
šjatixjue'eda' xtiža' Diosen' na', \underline{l} e da'nan' ba
gwza'a.

39 Can' goc, Jesúsen' gwde' doxen gan' mbane
Galilea gw \underline{d} ixjue'ede' xtiža' Diosen' to to yodao'
 \underline{c} he neto' be \underline{n} e' Israel, na' bebeje' da' \underline{x} igüe' da' yo'o
nyaz be \underline{n} e'.

*Jesúsen' beyone' to bene' che'ede' lepra**(Mt. 8:1-4; Lc. 5:12-16)*

⁴⁰ To bene' che'ede' yižgüe' dan' nzi' lepra jabigue' gan' zoa Jesúsen' na' bzoa xibe' gože'ne':

—Še chaclažo', guac yeca'o yižgüe' dan' che'edan'.

⁴¹ Na' Jesúsen' beži'ilaže'de' le' na' beḡue'ne' gwne':

—Chaclaža' yeyacdo'. Beyaque.

⁴² Cate' gwne' ca' la' bega'ate yižgüen' na' beyacde'.

⁴³ Nach Jesúsen' besele'ne' liže', bene' mandadw, gože'ne':

⁴⁴ —Notno yo'o can' ba beyona' le', con gwyej jaṅa' bḡoza' cont le'ede' baḡh beyacdo', na' bnežjw da' cheyała' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

⁴⁵ Perw ben' bi bchejde', yogo'ze bene' gože' can' goca'. Da'nan' Jesús'a bich goc šeje' con ca nla'ze gate'teze yež, san con gwde' do yiḡe', na' bia'cze bene' za'ac yogo'ze yež jasene'e le'.

2*Jesúsen' beyone' to bene' bi chda sla'a ni'a ne'e**(Mt. 9:1-8; Lc. 5:17-26)*

¹ Gwde to chop ža, Jesúsen' beyeje' da' yoble yež dan' nzi' Capernaum, na' bene' Capernaum ca' gosenezde' bežine' to yo'o ga ba gwzoacze'.

² Na' bedao'nez besežag bene' zan, necach gosezaque' yesenite' lo' yo'ona' ne cho'a yo'on, nach Jesúsen' gwdiḡjue'ede' xtiža' Diosen' len legaue'.

³ Nach besežin xonj bene' cont jasesane' lao Jesúsen' to bene' xinj bene' bi chda šla'a ŋi'a ne'e; tap bene' zjano'ene'.

⁴ Perw bi chac yesežine' gan' zoa Jesúsen' catec chy. Nach goseque'e tej dan' ncu'a' yichj yo'on na' beseletje' le' na'le to lo cam dao'.

⁵ Na' cate' Jesúsen' gocbe'ede' can' chesejni-laže'nen', gože' bene' güe'na':

—Xi'ina', ba bezi'xena' xtolon'.

⁶ BaI bene' chososed chosolo'e ley dan' bzoj da' Moisésen' zjachi'e na', na' gosone' xbab:

⁷ “¿Bixchen' chna benga ca'? le chon cuine' ca Dios. Nono zoa bene' gac yezi'xene' xtol'a' benach. Toz Diosen' gac yezi'xenen'.”

⁸ Perw Jesúsen' chacbe'eczedede' can' nac xbab chegaquen', na' gože' legaque':

—¿Bixchen' chza'laže'le ca'?

⁹ Še yapa'ne': “Ba bezi'xena' xtol'o'na'”, bi nezele še napa' yela' gwnabia' cont yezi'xena' xtole'na', san še yapa'ne': “Gwyas, beyoa' xcamon'”, na' nachia' še napa' yela' guac gac can' gwnian'.

¹⁰ Perw neda' naca' ben' gwsela' Dios golja' benach, gwlo'eda' le'e na'a zoa' yežlio nga napa' yela' gwnabia' cont yezi'xena' xtol'a' benach.

Nach gože' bene' xinja':

¹¹ —Chapa' le', beyas, beyoa' xcamon' na' beyej ližo'.

¹² La' beyaste bene' xinja' chesena'te bene' ca' nita'na' na' beyoa' xcamen'. Da'nan' yogo' bene' ca' besyebande' na' goso'e yela' choxclen che Diosen', gosene':

—Biña' le'echo yela' guac dan' nac ca'.

Jesúsen' goxe' Leví cont gwyejlene'ne'
(Mt. 9:9-13; Lc. 5:27-32)

¹³ Da' yoble gwyej Jesúsen' cho'a nisdao' na' be_{ne}' zan besedobe' gan' zeje' na' bsd blo'ede' lega_{que}' xtiža' Diosen'.

¹⁴ Na' Jesúsen' gw_{die}' latje gan' chi' Leví xi'in Alfo ch_{ch}ixjue' impuesto, na' cate' ble'ede' le' na' gože'ne':

—Da len neda'.

Nach gwzoža' Levín' na' gwyejlene'ne'.

¹⁵ Na' gwdena' goquen' chi' Jesúsen' liž Levín' na' güe'ej gw_dagwlene'ne' txen len zan be_{ne}' güe_{ch}ixjw na' len yeba_l be_{ne}' güen da' xi_nj, na' len be_{ne}' ca' zjanaque' Jesúsen' txen, le zan be_{ne}' zja'ac zjanao' le'.

¹⁶ Perw na' be_{ne}' ca' chososed chosolo'e ley dan' bzoj da' Moisés na' be_{ne}' fariseo ca' cate' besele'ede' che'ej chagüe' txen len be_{ne}' ca', gose'e be_{ne}' ca' zjanaque' Jesúsen' txen:

—¿Nacxe_{ch}en' ben' chsed chlo'e le'e che'ej chagwlene' txen be_{ne}' güe_{ch}ixjw na' yeba_l be_{ne}' güen da' xi_nj ca'?

¹⁷ Cate' Jesúsen' bende' can' gosene' na' gože' lega_{que}':

—Be_{ne}' bi chesacšene bi cheseyažjde' be_{ne}' güen rmed. Be_{ne}' chesacšende', lega_{quen}' cheseyažjde' be_{ne}' güen rmed. Gague be_{ne}' ba zjanaque' be_{ne}' güen len Diosen' zede_{ne}yoeda' cont yesyetin_jde' xtolen', san be_{ne}' güen da' xi_nj. Lega_{quen}' zjazaca'lebe' ca be_{ne}' cheseyažje be_{ne}' güen rmed.

Gosenabde' Jesúsen' bixchen' bene' zjanaque' le' txen bi chesone' gwbas

(Mt. 9:14-17; Lc. 5:33-39)

¹⁸ To ža cate' bene' ca' zjanaque' txen len Juanna' na' bene' zjanaque' txen len bene' fariseo ca' gosezoe' gwbas, ba|bene' jasa'aque' jasenabde' Jesúsen':

—Bene' ca' zjanaque' txen len Juanna' na' bene' ca' zjanaque' txen len bene' fariseo ca' chesone' gwbas, na' bene' ca' zjanaque' txen len le' bi chesone' gwbas. ¿Bixchen'?

¹⁹ Na' Jesúsen' gože' legaque':

—¿Guaque yesezoa gwbas bene' chaxe' to ga chac yela' güesagna' šlac ben' bšagnan' zualene' legaque'? Še zoa ben' bšagnan', bi gac yesone' gwbas.

²⁰ Perw žin ža cate' bich zoe' len legaque', cana'ch yesone' gwbas. Na' ca'czen' naquen len neda' na' len bene' ca' zjanaque' neda' txen.

²¹ 'Nono zoa bene' yode'e to lache'exo' na' yezoen' to lache' cobe, le lache' coben' yeben' cate' chiben' na' šon' lache' golen', na' gan' žon'na' gacchen da' xen.

²² Neca zoa bene' chgue'e vino cobe lo' bzod yide'exo', le vino coben' chšon' yide'exon' na' chbiayi' vinon' len yida'. San chesegue'e vino coben' lo' yid cobe cont bibi gaquen.

Bene' ca' zjanaque' Jesúsen' txen chesalje' dao ža che Dios

(Mt. 12:1-8; Lc. 6:1-5)

²³ To ža che Dios Jesúsen' gwdie' to ga nyaž trigw, na' bene' ca' zjanaque' le' txen gosezomagüe' chesalje' dao che trigon' šlac gosedie' gan' nyaženña'.

24 Nach bene' fariseon' gose'e le':

—Gwṇa'šc ĩbixchen' cheson bene' ca' zjanaque' le' txen žin da' bi cheyaḷa' yesone' ža che Dios?

25 Na' Jesúsen' gože' legaque':

—ĭBiṇa' gwlable can' ben da' rey David to ža cate' le' na' bene' lježe' ca' gosedone'?

26 Gwyo'o Davin' ga nac liž Dios cate' da' Abiatar goque' b̄xoz blaο, na' gwdagüe' yetextil da' nac che Dios da' bi chac gagw bene' bi nac b̄xoz, na' ľecze bnežjue' che bene' zja'ac len le'.

27 Ľecze gož Jesúsen' legaque':

—Diosen' gwleje' to ža cate' bi yeson beṇachen' žin cont gaclenen beṇač, gague gwleje' beṇachen' cont yesonxene' ža čen'.

28 Da'nan' naquen lo na' ṇia' bi da' nac güen goncho lente cate' nac ža che Dios, neda' naca' ben' gwseḷa' Diosen' golja' beṇač.

3

Jesúsen' beyone' to bene' n̄xo'oṇ šḷa'a taque'

(Mt. 12:9-14; Lc. 6:6-11)

1 Yeto ža che Dios Jesúsen' gwyo'e da' yoble to lo' yodao' che neto' bene' Israel na' ca hora' ba chi' to bene' n̄xo'oṇ šḷa'a taque'.

2 Na' bene' ca' že' lo' yodao'na' chosogüia chesene'e Jesúsen' še yeyone' bena' žan' nac ža che Dios cont de da' yosode'ede' yesagüe' xya che'.

3 Nach Jesúsen' gože' ben' n̄xo'oṇ taquen':

—Gwzoža' na' gwzecha nga.

4 Nach gwṇabde' bene' ca' yezica'chle:

—¿Bi da' cheyała' goncho ža che Dios? ¿Goncho da' güen, še goncho da' mal? ¿Cheyała' yoslacho bene', še cheyała' gotchone'?

Perw na' legaque' gosenite' šižize.

⁵ Nach Jesúsen' gwne'e legaque', bže'e can' gosone' xbab, na' lecze gocyaše' laže'de' dan' bi gosejle'e che', nach gože' ben':

—Bli naon'.

Na' blien', na' taquen' beyaquen binlo.

⁶ Nach besyežaš bene' fariseo ca' na' gosezomagüe' chosoxi'e len bene' ca' zjada' Herodes naquen' yesone' yesote' Jesúsen'.

Zan bene' nita' cho'a nisdaon'

⁷ Nach Jesúsen' gwyeje' cho'a nisdaon' len bene' ca' zjanaque' le' txen, na' zan bene' Galilea ja'ac len le'.

⁸ Na' zan bene' za'aque' Judea, na' Jerusalén, na' Idumea, na' yešla'a yegw Jordán, na' gan' mbane Tiro na' Sidón goside' bedesene'e le' cate' gosenezde' yela' guac da' chonen'.

⁹ Da'nan' Jesúsen' gože' bene' ca' zjanaque' le' txen yeseyiljue' to barcw dao' gan' cuie' cont bi yosoči bene' ca' zjanžaga' le',

¹⁰ le bene' zan ba beyone', na' bene' ca' ne' chese'ede' chosožiga' lježe' nac gac yesoxe'ne'.

¹¹ Na' bene' ca' zjajo'o zjanyaz da' xigüen' cate' chesele'ede' Jesúsen' chosozoa xibe' lagüen' na' da' xigüe' ca' chososya'an chese'en le':

—Len' naco' dogualje Xi'in Dios.

¹² Perw Jesúsen' gwdile' legaquen na' bene' man-dadw bi yesenan no nac le'.

Jesúsen' gw_{ch}ie' be_{ne}' ši_ži_nw ca' gosaque' txen len le'
(Mt. 10:1-4; Lc. 6:12-16)

¹³ Beyoža' Jesúsen' gwloe' to lo ya'a na' goxe' ba_l be_{ne}' goclaže' šja'aclene' le', nach gosa'aque' ja'aque' gan' zoen'.

¹⁴ Nach gwleje' ši_ži_nw be_{ne}' yesenita' len le', cont sele' legaque' šjasedixjue'ede' xtižen'.

¹⁵ Na' bnežjue' legaque' yela' guac cont yesyeyone' be_{ne}' güe' na' yela' gwnabia' cont yesyebeje' da' xigüe' da' yo'o nyaz be_{ne}'.

¹⁶ Ši_ži_nw be_{ne}' quin' gosac: Simón ben' le_{ce} gože'ne' Pedro;

¹⁷ Jacobo len be_{ne}' biše' Juan be_{ne}' ca' zjanac xi'in Zebedeo, na' bsi'e legaque' Boanerges, zeje diža' be_{ne}' zjanac ca' yi' gwzio' cate' chašjw chtinen;

¹⁸ nach Andrés, na' Felipe, na' Bartolomé, na' Mateo, na' Tomás, na' Jacobo xi'in Alfeo, na' Tadeo, na' Simón ben' gwde'e be_{ne}' ca' zjanzi' cananista,

¹⁹ na' Judas Iscariote ben' gwdechle bdie' Jesúsen' lo na' be_{ne}' ca' chesegue'ede' le'.

Gosene' Jesúsen' bebeje' da' xigüe' len yela' guac che Beelzebú
(Mt. 12:22-32; Lc. 11:14-23; 12:10)

Beyoža' Jesúsen' len be_{ne}' ca' zjanaque' le' txen goso'e lo' yo'o gan' zoe' ca' hora',

²⁰ na' da' yoble besežagchgua be_{ne}', neca goc yes'e'ej yesagw Jesúsen' len be_{ne}' ca' zjanaque' le' txen.

²¹ Na' cate' goseneze biše' ljež Jesúsen', ja'aque' cont yesyechene', le' gosene' chactonte'.

22 Nach be_{ne}' ca' bososed bosolo'ede' ley dan' bzoj da' Moisés gosa'aque' Jerusalén na' ja'aque' distritw Galilea gan' chsed chlo'e Jesúsén' na' gose'e be_{ne}' ca' že'na':

—Benga yo'o nyaze' Beelzebú dan' chnabia' da' xigüe' ca', na' Beelzebún' chaclenen le' cont chebeje' da' xigüe' zjajo'o zjanyaz be_{ne}'.

23 Nach Jesúsén' goxe' be_{ne}' ca' na' bsd blo'ede'ne' gwne':

—¿Nac gon Satanás dan' chnabia' da' xigüe' ca' yebejen lecze da' xigüe'?

24 Še to gobiern choje' chop šon cuenle na' yeyoža' yesedile legacze', gobiernna' bi sibi'e.

25 Na' še be_{ne}' že' toz yo'o yesechoje' chople na' yesedile legacze', gague sša yesenite' txen.

26 Na' še Satanásen' len da' xigüe' chen yesechojen chople na' yesedilen, lecze bi sibian', san na' yeyož yedon.

27 'Nono gac šo'e lo' yo'o che to be_{ne}' gual na' que'e bi da' de che' še cbi zgua'tec gwcheje' be_{ne}' gual na', lete gone' ca' nach gac que'e bi da' de che'.

28 'Da' li žia' le'e, yogo' da' xinj da' chon be_nach na' yogo' diža' bya' da' yese_{ne}', Diosen' yezi'xene' chen še yesyeti_njde'.

29 Perw note'teze be_{ne}' ne' yela' ya' che Spiritw che Dios, gwbat yezi'xen Diosen' che', san de dola' che' toli toca_{ne}.

30 Gwne' ca' dan' gosene' che' yo'o nyaze' da' xigüe'.

*Xna' Jesúsén' na' be_{ne}' biše' gosaxe'ne'
(Mt. 12:46-50; Lc. 8:19-21)*

31 Na' bžin xna' Jesúsen' len beṇe' biše', na' gosenite' chy'ole gosaxe' le'.

32 Na' beṇe' ca' zjanita' cuit Jesúsen' gose'ene':

—Xna'o len beṇe' bišo' ca' zjanite' chy'o na' chesyeyiljue' le'.

33 Nach Jesúsen' gože' legaque':

—¿Nezele non' nac xna'a na' no zjanac biše' lježa'?

34 Nach gwne'e beṇe' ca' zjachi' cuite'na', na' gwne':

—Beṇe' quin' zjanac xna'a na' zjanaque' biše' lježa'.

35 Le note'teze beṇe' chone' da' chna'laže' Dios, bena' nac beṇe' biša', beṇe' zana', lecze naque' xna'a.

4

Jempl che beṇe' goz trigo

(Mt. 13:1-9; Lc. 8:4-8)

1 Yeto ža yoble gwzolao Jesúsen' chsed chlo'ede' cho'a nesdaon', na' besežagchgua beṇe' zan juisyw gan' chi'ena'. Na' da' besežagchgua beṇe' zan, benten byen gwyo'o Jesúsen' to lo' barcw dao' da' chda' lo nesdaon' cho'a yo bižen' na' gwchi'e lo'enna', na' yogo' beṇe' ca' gosenite' cho'a nesdaon' ga nac yo biž.

2 Nach da' zan da' bsed blo'ede' legaque' len jempl da' bi'e. Na' bzejni'ide' legaque', gwne':

3 —Le gwzenag da' nga: To beṇe' güen žin jeze' trigw.

4 Na' šlac zeje' chose' trigon', late' biṇ che trigw dan' chazen' jasechazen chanez nach be ca' žia xil be chaš le'e yaba gosagwban'.

⁵ Yelaten' jasechazen ga nac lo yej, ga bibi yotec zoa, na' da' nga byob blan' le bi jasechazen ga nac sitjw.

⁶ Perw cate' bla' gwbiža' na' bzeyen len na' gwbižen, le gague yo'otec loenna' sitjon'.

⁷ Yelaten' jasechazen ga nac lo yag yeše', na' yag yešen' gosecha'on na' bosololen' len, na' bibi gosebian.

⁸ Perw na' yelaten' jasechazen ga nac yo šagüe'. Da' nga beselan' na' gosecha'on na' leca güen gosebian, balen gosebian do šichoa güeje to ton, balen gayon, na' yebalen do to gayoa.

⁹ Na' gože' legaque':

—Le'e žia nagle da' chene, le gwzenag xtiža'na'.

Bichen' bzejni'ide' bene' len jempl

(Mt. 13:10-17; Lc. 8:9-10)

¹⁰ Gwdena' cate' ba besyeya'ac bene' zan ca', bene' ca' zjanita' gala'ze len le' na' len bene' šižiṅw ca' zjanaque' le' txen, gosenabde' le' bi zejen jempl dan' bi'en.

¹¹ Na' gože' legaque':

—Nono na' neze can' nac yela' gwnabia' che Diosen', perw ba chone' cont le'e chejnilaže'lene' nezelen. Na' bene' bi chesaclaže' yesejnilaže' Diosen', choe'lengaca'ne' xtižen' len jempl.

¹² Chona' ca' cont yesele'ede' can' chonan' na' bitw yesache'ede' bi zejen, na' cont yesende' xtižan' na' bi yesejni'iden', na' neca yesyetinjde', neca yezi'xen Diosen' xtolen'.

Jesúsen' bzejni'ide' bi zejen jempl che ben' ben goza'

(Mt. 13:18-23; Lc. 8:11-15)

13 Nach gože' legaque':

—¿Bi chejni'ile jempl nga? ¿Nacxe gac šejni'ile jempl yoble da' güe'lena' le'e?

14 Ben' ben goza' naque' ca ben' choe' xtiža' Diosa'.

15 Na' baḷ beṇe' zjanaque' ca biṇ dan' beselažo' chanez, le chosozenague' cate' chas chlalje xtiža' Diosen', na' ca cheyoža' la' chžinte Satanásen' dan' chnabia' da' xigüe' ca' na' chebejen xtiža' Diosen' dan' ba yo'o yichjlažda'ogüen'.

16 Yebaḷ beṇe' zjanaque' ca biṇ dan' beselažo' ga nac lo yej na' bi ben loen. Legaque' chesyebede' chosozenague' xtiža' Diosen',

17 perw šložga chesezibi'e, na' cate' chesac bi da' mal chegaque' o bichle chesone beṇe' legaque' neche da' chosozenague' xtiža' Diozen', la' chesebejyichjten'.

18 Na' yebaḷe' zjanaque' ca biṇ dan' besego'onen ga nac lo yag yeše'. Chosozenague' xtiža' Diosen',

19 na' šlac zjambane' chesyelaḷ chesyēžejde', na' da' chesaclaže' yeseni'e chziye'en legaque' na' chesezelaže' yogo'ze da' de yesata' che'. Yogo' da' qui bi choen' latje yega'an xtiža' Diosen' lo' yichjlažda'ogüen' na' da'n'an' bi chesejnilaže' le' ca cheyaḷa'.

20 Perw na' nita' baḷ beṇe' chosozenague' xtiža' Diosa' na' chesejnilaže' le' do yichj do laže', beṇe' qui zjazaca'lebde' ca biṇ dan' beselažo' lo yo šagüe'. Baḷe' zjanaque' ca biṇ dan' gosebjan šichoa güeje to ton, na' yebaḷe' ca da' ca' bexoen' gayon, o ca no da' ca' bexoen' to gayoa güeje to ton.

*Jempl che yi' dan' chguala'cho**(Lc. 8:16-18)*

21 Lecze gože' legaque':

—Cate' chguala'cho to yi' ¿gw dosa'chon to caj o gwzoachon xan cam? Bi choncho ca', san chguala'cho yin' na' chzoachon sibe cont gwsenin'.

22 Na' da' ngaše' chia' neda' na'a, lenna' gwlo'elaon, na' da' nono na' neze chia', žin ža yesenezden'.

23 Le'e žia nagle da' chene, le gwzenag xtižan'.

24 Lecze gože' legaque':

—Le gwzenag da' quingan' da' chzejni'ida' le'e. Le con can' chonle len len, can' gon Diosen' len le'e. Na' gonchcze' cont soachle mbalaz da' chzenagle che'.

25 Le še chzenagle xtižen' gwzejni'ichde' le'e, perw na' še bi chzenaglen, da' daon' ba nezele yeyanlaže'len.

Jempl che bin dan' chlan' na' chcha'on

26 Lecze gwna Jesúsen':

—Yela' gwnabia' che Diosen' zaca'leben ca dan' chac cate' to bene' chaze' bite'teze bin lo yo.

27 Chjaytase' na' chebane' cheyase', chde ža yel, na' chla' dan' gozen' na' chcha'on, perw le' bi nezde' naquen' chac.

28 Le to gualazze yežlio nan' chonen len, zgua'tec chla' lbe'edagüen', nach chlan' dao, na' cheyoža' chbian da' cheyala' cuian.

29 Na' cate' ba goł dan' chbianna' na' chja'aque' chjasyexi'en, le ba bžin cho'a gwlap.

*Jempl che bin che xomdas**(Mr. 13:31-32; Lc. 13:18-19)*

30 Nach lecze gwna Jesúsen':

—Gonchcho xbab bi ca da' zaca'lebe yela' gwnabia' che Diosen' na' güe'cha' jempl cont nezele šanch be_{ne}' yosozenag che' cont nabi'e yichjlažda'ogaque'.

31 Naquen ca to bi_n che xomdas da' chyaž lo yo. Len chnabia' nac da' dao' len bi_n ca' chazcho lo yežlion'.

32 Perw cate' ba_{ch} nyažen, chcha'on na' chaquen da' xench lao yi_xe' cuan ca', na' da' xenchgua chac xol che xozenna', na' lente byi_n dao' ca' chesyezi'laže'ba' lo xozenna'.

Jesúsen bgone' žin jempl

(Mt. 13:34-35)

33 Can' blo'e Jesúsen' xtiža' Diosen' yogo' ni'a, bi'e zan jempl ca che ben' goza' na' che bi_n ca', con ga zelao goc gosejni'ide'.

34 Bitwbi bzejni'ide' lega_{que}' sin ca be'e jempl, nach cate' bich nita' be_{ne}' zan ca', bzejni'ide' be_{ne}' ca' zjanaque' le' txen bi zejen yogo' da' ca'.

Jesúsen' bebecžie' be' bdono' len nisdao'

(Mt. 8:23-27; Lc. 8:22-25)

35 Leze lo žana' cate' gw_xin, Jesúsen' gože' be_{ne}' ca' zjanaque' le' txen:

—Le šo'o laga'cho yešla'a nisdaon'.

36 Nach bosyocua'a_{ne}' yezica'chle be_{ne}' ca' že' gan' ba bsed blo'ede' na' gosa'aque' lo' barcw daon' gan' ba yo'ocze Jesúsen'. Na' yeba_l be_{ne}' lecze ja'aclene' lega_{que}' len yeto chop barcw dao'.

37 Na' gwzolao gwyechjchgua to be' bdono' na' nisdaon' leze chas chatan', na' gwzolao cheyož nis lo' barcon'.

³⁸ Jesúsen' ba chtase' xante barcon' to lo xcogue' caten' goc ca'. Na' bosyosbane' le' gose'ene':

—¡Maestro! ¿Bibi de chza'lažon' še ba gwdebe nisdaon' chio'?

³⁹ Nach gwyas Jesúsen' na' gwdile' be' bdonon' na' gože' nisdaon':

—¡Šižize! ¡Šižize!

Na' bebe ži be' bdonon' na' beyata'ži nisdaon'.

⁴⁰ Nach Jesúsen' gože' beņe' ca' zjanaque' le' txen:

—¿Bixchen' chžebtecle? ¿Nacxechen' bi chejle'le chia'?

⁴¹ Legaque' besežebchgüe' na' gose' lježe':

—¿Noxe benga? lente be' bdonon' na' len nisdaon' chosozenaguen che da' že'.

5

Beņe' Gadara yo'o nyaze' da' xigüe'

(Mt. 8:28-34; Lc. 8:26-39)

¹ Besežine' šla'a nisdaon' gan' mbane Gadara,

² na' cate' bechoj Jesúsen' lo' barcon' to beņe' yo'o nyaz da' xigüen' bchoje' lo' capsantw na' jašague' le'.

³ Bena' ba zoacze' capsantw na'le na' nono chzoe goxe' le', ne len gden ca gosezoede' le'.

⁴ Da' zan ni'a bosocheje' ni'a ne'e gden, perw bia'cze gwchoguen', con bzoxy btinen', na' nono gwzoe le'.

⁵ Yogo' ža yogo' yel gwde' bosya'adie' do lo ya'a na' do ladjo ba ca' na' tža tža chone' zi' cuine' len yej.

⁶ Na' cate' ble'ede' Jesúsen' zito' gwyejsese' jazoa xibe' lagüen',

⁷ na' da' xigüen' benen cont bosya'adie' gože' le':

—¿Bix_{chen}' chgoša' chlaže' chio' len neda', Jesús? Naco' dogualje Xi'in Dios bene' nape la'zelagüe yela' chnabia' xen. Neche Dios chñeyoeda' le' bi gwsaco' neda'.

⁸ Da' xigüen' benen cont gwna ben' ca' dan' gož Jesúsen' len:

—Da' xigüe', bsan benga.

⁹ Na' gwñabe Jesúsen' len:

—¿Bi lio'?

Na' boži'in xtižen':

—Legión lia', le nac zanto'.

¹⁰ Na' goseneyoen Jesús'a' bi yeselen' zito' cate' yesyežašen' yichjlaždao' ben'.

¹¹ Na' gała'ze lo ya'ana' chesaš zan coš chesagwba'.

¹² Nach da' xigüen' goseneyoen le':

—Gwselā' neto' gan' nita' coš ca' na' beñ latje šjajo'oto' lo' yichjlažda'oban'.

¹³ Nach Jesúsen' bnežjue' latje, na' besyechoj da' xigüen' lo' yichjlaždao' bena' na' jasyeyo'on yichjlaždao' coš ca'. Nac ca do chop mil cošen'. Na' besyeyetjes coš ca' le'e ya'a gan' nita'ban' na' jaselažo'ba' lo' nisdao' ga gosatba' gose'ejba' nis.

¹⁴ Nach bene' ca' chosoyoe' cošen' bosyoxonje' jasyeyeže' bene' lagüe yež len bene' chaš yixe' can' goca'. Na' ja'ac bene' jasene'e bixen' goc.

¹⁵ Cate' besežine' gan' zoa Jesúsen' besele'ede' ben' ba gwyo'o gwyaz da' xigüen', na' na'a ba chi'e nyaz xalane' na' ba bezoa yichjlažda'ogüen' binlo. Na' besežebe'.

¹⁶ Na' bene' ca' besele'ede' can' goquen' goso'e diža' che dan' goc len ben' gwyo'o gwyaz da' xigüen', lez ca' dan' goc len coš ca'.

17 Nach gosezolagüe' gosata'yoede' Jesúsen' yeze'e lažgaquen'.

18 Na' cate' beyo'o Jesúsen' lo' barcon' ben' ba gwyo'o gwyaz da' xigüen' gota'yoede' Jesúsen' šejlene' le'.

19 Perw Jesúsen' bi be'e latje, san gože' le':

—Beyej ližo' na' jayež beņe' lo' yo'o chio' na' no beņe' migw chio' yogo' da' güen da' ba ben Xancho Diosen' len le' na' catec ba beyaše' beži'ilaže'de' le'.

20 Na' beza' ben' na' gwzolagüe' cho'e diža' yež ca' gan' mbane distritw Decápolis yogo' can' ben Jesúsen' len le', na' yogo' beņe' gosene xtižen' besyebande'.

Bi' no'ol che Jairo, na' no'ol ben' gwdane' xa Jesúsen'

(Mt. 9:18-26; Lc. 8:40-56)

21 Cate' bežin Jesúsen' cho'a nesdaon' zeze'e lo' barcw daon' dan' zeza' šla'a nesdaon', beņe' zan ja'aque' gan' bežinen', na' Jesúsen' bega'ane' cho'a nesdaon' na'ze.

22 Nach bžin to ben' nac beņe' gwnabia' che yodao' che yežna', lie' Jairo. Cate' ble'ede' Jesúsen' bzoa xibe' lagüen'

23 na' gota'yoechgüede'ne' gože'ne':

—Xi'ina' no'ole ba chatbe'. Benšca goclen yo'o xoa taco' yichjbe' cont yeyaquebe' na' bi gatbe'.

24 Nach Jesúsen' gwyejlene' le'. Na' beņe' zan ja'acch, na' bosochichgüe' le'.

25 Ladjo beņe' ca' len to no'ol che'ede', ba goc šižinw iz chzoe' gwbao'.

²⁶ Ba bžaglaochgüe' jen cuine' rmed len zan bene' güen rmed ca', na' ba benditje' yogo' xmechue' da' de, perw bitwbi gwxi'czen, san chyalalen.

²⁷ Cate' bende' cheso'e xtiža' Jesúsen', no'olna' gwdie' ladjo bene' ca' na' bžine' cože'le Jesúsen' na' gwdane' xen'.

²⁸ Le bene' xbab, gwne': "Con še ba gwdana' xen' nach yeyactecza'."

²⁹ Na' da' li cate' gwdane' xen' la' gwlezte gwba'o' dan' zoen', na' no'olen' gocbe'ede' ba bega'a yižgüe' chen'.

³⁰ Na' Jesúsen' la' gocbe'etede' to bene' ba beyacde' len yela' guac chen', nach gwyechje' gwne'e bene' ca' nita' cože'le, na' gwñabde' legaque':

—¿Non' gwdan xan'?

³¹ Nach bene' ca' zjanaque' Jesúsen' txen gose'ene':

—Ba ble'eczede' ca chosochie' le', ¿bixchen' chñabo' non' gwdan xaon'?

³² Perw Jesúsen' chne'e nile na'le cont le'ede' non' gwdan xen'.

³³ Nach no'olen' nezde' can' ba goc che' na' do chaž chžebe' gwyeye' jazoa xibe' lagüen' na' gože'ne' yogo' da' li.

³⁴ Na' Jesúsen' gože'ne':

—Xi'ina', ba beyacdo' dan' chejnilažo' neda'. Beyej binlo, na' bich bi gacdo' len yižgüe' chion'.

³⁵ Ne' choe'te Jesúsen' dižan' ca' cate' besežin bene' gosa'ac liž xan yodaon', na' gosi'e xa bi' no'ol daon':

—Ba got bi' chion', ¿bixchen' choncho' zed Maestro nga?

36 Perw Jesúsen' bi bene' cuent dan' chesena beṇe' ca', na' gože' xan yodaon':

—Bitw žebo', con gwyejle' chia'.

37 Na' bi bi'e latje šja'aclen beṇe' zan le' gan' xoa bi' no'olen', san Pedro, Jacobo na' Juan beṇe' biše' Jacobo, beṇe' ca'ze ja'aclen le'.

38 Na' cate' besežine' liž xan yodaon', ble'ede' ba chi' žaš chesosye'e chesebeže'.

39 Nach gwyo'e na' gože' legaque':

—¿Bixchen' mbecle žaš chbežle? Bi no'ol daon' biṇa' gatbe', san chtasben'.

40 Perw bosoxiže' gosonle' che'. Nach Jesúsen' bešaše' yogo'lole', na' gwche'e xaxna'be' na' beṇe' ca' zja'aclen le' na'ze na' goso'e len le' gan' de bi' no'ol daon'.

41 Na' beṁue' taca'ben' na' gože'be':

—Talita, cumi —zeje diža': Bi' no'ole, chapa' le' beban na' beyas.

42 Nach bi' no'ol daon' la' beyastebe' na' goc beza'be', le šišinw izegueben'. Na' beṇe' ca' besele'e leca besyežejde' can' goca'.

43 Perw Jesúsen' gože' legaque' nono yese'e ca', na' gože' legaque' yeso'e bi' no'ol daon' da' gagwbe'.

6

Jesúsen' bežine' distritw gan' chi' yež Nazaret (Mt. 13:53-58; Lc. 4:16-30)

1 Na' beza' Jesúsen' na' bežine' laže', na' beṇe' ca' zjanaque' le' txen ja'aclene' le'.

2 Na' cate' bžin ža che Dios, Jesúsen' gwzolagüe' bsd blo'ede' lo' yodaon'. Na' beṇe' zan beṇe' gosende' xtižen' besyebande' na' gosene':

—¿Nacxe chaquen' cho'e diža' ca'? ¿Bi yela' sinan' neze' na' ¿nacxečen' chac chone' yela' guac ca'?

³ Benga chonšagüe' yag na' naque' xi'in María. Nombia'chwne' na' bene' biše' Jacobo, José, Judas na' Simón, na' lecze bene' zane' ca' nite' lažcho nga.

Na' da' zjanombi'ene' nan' bi gosaclače' yesejle'e che'.

⁴ Nach Jesúsen' gože' legaue':

—Yogo'ze bene' chesonxene' bene' choe' xtiža' Diosen', perw bene' gualaž che', bene' biše' lježe' na' bene' lo' yo'o che' bi chosozenague' che'.

⁵ Na' ne to yela' guac ca goc gone' na', lete gwxo'oa taquen' yichj to chop bene' güe' na' beyone' legaue'.

⁶ Na' bebande' dan' bi gosejle' bene' che'. Na' gwdechle gwda Jesúsen' bsed blo'ede' to to yež dao' ca' nita' gała'ze.

Jesúsen' gwsele' bene' ca' zjanaque' le' txen jasedixjue'ede' xtiža' Diosen'

(Mt. 10:5-15; Lc. 9:1-6)

⁷ Na' goxe' bene' šižinw ca' na' gwsele' chop güeje' to to yež, na' bnežjue'ne' yela' gwnabia' cont goc besyebeje' da' xigüe' lo' yichjlaždao' bene'.

⁸ Na' cate' za' yesa'aque' gože' legaue' bibi yesoxe' chanez, ne bzod, ne yetextil, ne mechw, con yesoxe' to xis da' yosočiše'.

⁹ Na' yosoleje' yel perw bi yesoe' yeto xcamise'.

¹⁰ Na' lecze gože' legaue':

—Cate' žinle to liž bene', na'ze yega'anle šlac zoale lagüe yeža', cate'ch yeza'le yeža' cana'ch yeza'le latja'.

11 Na' še zoa ga bi yosolebe' le'e nēca yosozenague' chele, cate' yeza'le na' le cuibe nī'alen' yo bište cont nacbia' malen' chesone' bi chosozenague' xtiža' Diosen'. Da' li žia' le'e cate' žin ža gac juisyw beṇe' ca' bi yosolebe' le'e yesacche' castigw clēl ca beṇe' Sodoma na' beṇe' Gomorra.

12 Nach gosa'aque', na' goseyixjue'ede' cheyaḷa' yesyētīje xtoḷa' beṇachen'.

13 Leze besyebeje' da' xīgüē' da' yo'o nyaz beṇe', na' zan beṇe' güē' goseyebe'ne' set na' besyeyacde'.

Gosote' Juan ben' bzoe' beṇe' nis
(Mt. 14:1-12; Lc. 9:7-9)

14 Na' ca nac rey Herodes, gwñezde' can' chesone', le yogo'ze beṇe' gosende' can' ben Jesúsēn'. Na' Herodesen' gwne':

—Juan ben' bzoe' beṇe' nisen' ba beban ladjo beṇe' guat ca'. Da'nān' chaque' chone' yēḷa' guac.

15 Yebale beṇe' gosene':

—Naque' ben' be' xtiža' Diosen' canī', ben' le Elías.

Na' yebale' gosene':

—Naque' con to beṇe' choe' xtiža' Dios ca beṇe' ca' gosoe' xtiža' Diosen' canī'te.

16 Cate' Herodesen' bende' dižan' nac ca' na' gwne':

—Bengan' Juan ben' gwchogbi'an gosechogue' yene', na' nā'a ba bebane' ladjo beṇe' guaten'.

17-18 Le Herodesen' beque'e Herodías na' gwzoalene' le' goque' xo'ole' ḷa'czḷa' Herodíasna' naque' xo'ole Felipe biše'na'. Na' Juanna' gože' Herodesen':

—Bi cheyaḷa' soalen no'ol che beṇe' bišon'.

Da'nan' Herodesen' gw̄chogbi'en gosezene' Juanna' na' bosocheje'ne' len gden lo' yo'o ližya gan' gosegüe'ene'.

19 Can' goc Herodíasna' bgue'ede' Juanna' na' goclaže' gote'ne', perw bi goc.

20 Le Herodesen' gw̄nezde' Juanna' naque' to bene' chon da' zej to licha na' to bene' yo'o lo na' Dios, nachen' Herodesen' bžebe' Juanna' na' bi be'e latje bi gone Herodíasen' le'. Na' la'czla' bi gwyejni'iteque Herodesen' dan' bšalj Juanna', con bebede' bzenague' che'.

21 Perw Herodíasen' beyiljwlaže' nac bene' cate' ben Herodesen' lni goła' ža le', bsiñi'e xše' da' gwdagüe' len bene' gwnabia' che' ca' na' no xan soldadw ca' na' nochle bene' blao že' distritw Galilean'.

22 Bi' no'ol che Herodíasen' gwyo'obe' bya'abe' gan' gosagüe' xšen' na' beca'a Herodesen' can' bya'aben', lez ca' ben' gosagw len le' xšen'. Na' reyna' gože' bi' no'ola':

—Gwnabe neda' con da' žan chio' na' goñan'.

23 Na' lecze gože'be':

—Diosen' naque' testigw chia' gona' le' con da' nabdo'nda', la' gašjo yež ca' gan' mbanda' chnabi'a.

24 Na' bechojbe' na' gožbe' xna'ben':

—¿Bi nabda'ne'?

Na' le' gože'be':

—Gwnab yichj Juan ben' chzoe' bene' nis.

25 Na' la' beyo'otebe' gan' chi' reyna' na' gožbe'ne':

—Che'nda' netecna'a goño' neda' to lo' platw yichj Juan ben' chzoa bene' nis.

26 Na' ne late'ze bi gwyazlaže' reyna' gone' can' gož no'ol güegon' le', perw bachle gwne' lao

be_{ne}' ca' jasa'ac l_nin' Diosen' naque' testigw c_{he}' gwnežjue'be' bite'teze nabebe' l_e', da'nan' bi bžone' gac dan' gw_nabebe' l_e'.

²⁷ Nach l_a' gwse_la'te reyna' to soldadw na' gože'ne' šjaxi'e yichj Juanna'.

²⁸ Na' gwyej soldadon' l_o' yo'o ližyan' na' jachogue' yen Juanna', na' bžie' yichje' to l_o platw jasanen' bnežjuen' bi' no'ola', na' bi' nga bnežjwben' x_na'be'.

²⁹ Cate' goseneze be_{ne}' ca' zjanaque' txen len Juanna', jasexi'e cuerp c_{he}n' cont bosocuaše'ne'.

Jesúsen' bguagüe' gayo' mil be_{ne}'

(Mt. 14:13-21; Lc. 9:10-17; Jn. 6:1-14)

³⁰ Beyoža' postlw ca' besyežague' len Jesúsen' na' gose'ene' bica' da' ba gosone' na' da' ba bosolo'ede'.

³¹ Na' Jesúsen' gože'ne':

—L_e da, l_e šo'o ga nac lchojiže' yezi'laže'cho late'.

Gwne' ca' l_e chep chetj chac be_{ne}' , n_eca chac latje yesagüe'.

³² Nach Jesúsen' len postlw c_{he}' ca' gosa'aque' ja'aque' legacze' to l_o' barcw, ja'aque' ga nac lchojiže'.

³³ Perw zan be_{ne}' besele'ede' gosa'aque' na' besyeyombi'e Jesúsen', na' zan yež be_{ne}' ca' bosoxonjsese' na' byobch besežine' ca' Jesúsen'.

³⁴ Na' cate' Jesúsen' bchoje' l_o' barcon' ble'ede' ba besežag be_{ne}' zan na' beyaše' beži'ilaže'de' legaque', l_e nite' ca' nita' no xila' be nono de gwyoeba'. Nach gwzolaogüe' bsd blo'ede' legaque'.

³⁵ Cate' ba zoa x_n, be_{ne}' ca' zjanaque' l_e' txen gose'ene':

—Ba zoa x̄in, na' latj gan' zoacho nga naquen latj daš.

³⁶ Na' besel̄a' beñe' quinga cont šja'aque' ga že' beñe' do ranšw na' do yež dao' ca' dan' nyečhj mbi'i šjasexi'e da' yesagüe', le bibi de yesagüe'.

³⁷ Na' Jesúsen' gože'ne':

—Le'e le güe'e da' yesagüe'.

Na' legaque' gose'ene':

—Bi de laxjwto' che chop gayoa ža žin cont šjaxi'to' da' güe'to' legaque' yesagüe'.

³⁸ Jesúsen' gože'ne':

—¿Gaca' yetextilen' de chele? Le šja'ac le šjana'.

Cate' gosenezde' na' gose'ene':

—De gayo' yetextil na' yechop bel̄ ya'a.

³⁹ Nach gože' beñe' ca' yesebi'e to xonj güeje' lo yixyen'.

⁴⁰ Na' gosebe' to gayoa güeje' na' yebale' šiyon güeje'.

⁴¹ Nach Jesúsen' gwxi'e yetextil ca' gayo' na' bel̄ ya'an chope, na' gwne'e le'e yaba bi'e yela' choxc̄len che Dios na' bzoخة' yetextilen' bi'en beñe' ca' zjanaque' le' txen cont goseyisen' len beñe' ca'. Leze gwdis̄e' bel̄ ya'a ca' chop lao yogo'lol̄ beñe' ca'.

⁴² Na' yogüe' gosagüen' na' goseljde'.

⁴³ Beyoža' bososše'e yešiziñw žome yetextil bixjw na' len late' güeje bel̄ da' bega'an.

⁴⁴ Na' beñe' ca' gosagw yetextilen' gosaque' gayo' mil beñe' byo, bi cuent no'ol ca' len bidao'.

*Jesúsen' gwze'e lo nis
(Mt. 14:22-27; Jn. 6:16-21)*

45 Gwdena' Jesúsen' bene' byen besyeyo'o be_{ne}' ca' zjanaque' le' txen lo' barcon' cont yesyela_{ga}'zegue' nisdaon' na' yesežine' Betsaida, šlac le' za' chesele' be_{ne}' ca' žena' ližgaque'.

46 Na' cate' beyož bzede' be_{ne}' ca' diža', gwyeje' lo ya'an bol güiže' Dios.

47 Na' ca nac barcon', cate' goc cho_l ba zejen gacho_l nisdaon', na' toze Jesúsen' ne' zie' ga nac yo biž.

48 Na' ble'ede' bi chac yosyose'en bin_{lo}, le ben' chech_{jen} clele na' bi choen' latje sa' barcon'. Na' šbal beyetj Jesúsen' ya'ana' na' gwze'e lo nisen' ba zej gale' gan' zja'aquen', na' ba zoa teze' gan' zjaya'aquen'

49 cate' besele'ede' le' chze'e lo nisen'. Na' gosacde' še da' chda chelen'. Na' bososye'e.

50 Le yogüe' besele'ede'ne' na' besežebe'. Perw le' la' bol güižte' lega_{que}', gože'ne':

—Le gon_{ch}ach laže'le; nedan', bitw žeble.

51 Nach gwyo'e lo' barcw gan' zjaya'ac be_{ne}' ca', nach gwche'ži ben'. Na' lega_{que}' leca besyebande' na' besyežejde',

52 le bi gosejni'ide' dan' bene' yela' guac len yetextil ca', na' bi_{na}' yesejnilaže' le'.

*Jesúsen' beyone' be_{ne}' güe' ca' že' Genesaret
(Mt. 14:34-36)*

53 Na' gose_lague' nisdaon' na' besežine' yežlio gan' nzi' Genesaret, na' bosocheje' barcon' cho'a nisdaon'.

54 Na' cate' beyož besyechoje' lo' barcon' be_{ne}' ca' la' besyeyombia'te' Jesúsen'.

55 Na' ja'acsese' doxen gan' mbane Genesaret, na' do lo cam dao' zjanxoe' bene' güe' ca' jas-esane'ne' gan' zjanезде' zoa Jesúsén'.

56 Na' gate'teze gwyej Jesúsén', do yixe', do yež, con goseyixjue' bene' güe' ca' do chanez na' goseneyoede' Jesúsén' gwnežjue' latje yesoxe' la'ch late'ze xni'a xen', na' yogo' bene' gosoxen' besyey-acde'.

7

Dan' chchoj lo' laždao' benačhen' chonen cont laždaqüen' bi naquen xilaže' len Diosen'

(Mt. 15:1-20)

1 Nach bene' fariseo ca' na' len bene' ca' bososed bosolo'e dan' bzoj da' Moisés gosā'aque' Jerusalénna' na' ja'aque' gan' zoa Jesúsén'.

2 Na' besele'ede' bal bene' ca' zjanaque' Jesúsén' txen con gosagüe' nēca bosyone'e zan ni'a can' chesacde' cheyla' yesone', na' da'nān' gosezi'diže' legaque'.

3 (Le bene' fariseo ca' na' yogo' bene' Israel gualaž cheto' ca' chesonxene' costumbr ca' da' bosyocua'anlen da' xozxta'oto' ca' neto' bi yesagüe' še biān' yosyone'e zan ni'a.

4 Na' cate' yesyežine' lagüe ya'a, bi yesagüe' še biān' yosyone'e, na' da' zanch costumbr da' zjana'ogüe', ca no yeseyibe' xiga' ga chese'eje' nis, no yeso' xguague, no yeso' ya na' no xcame'.)

5 Nach bene' fariseo ca' na' bene' ca' bososed bosolo'ede' dan' bzoj da' Moisésen' gosenabde' le':

—¿Bixchen' bi cheson bene' ca' zjanaque' le' txen can' goson bene' gol ca'? san con chesagüe' sin chi chosyone'e zan ni'a.

⁶ Jesúsen' gože' legaque':

—Chonle cayanen' bzoj da' Isaíasen' che le'e nacle bene' gwxiye' gan' bzoje', žan':

Bene' qui chesonxene' neda' len diža' cho'a, perw bi chesonxene' neda' len lažda'ogaque'.

⁷ Bibi zejen dan' chesonxene' neda',

le dan' chososed chosolo'eden' naquen da' chnalaže' benachze.

⁸ Bi chonle ca chnalaže' Dios, san na'ole can' ža benachen' cheyala' gonle, chyible no yeso' xguague, no xiga' ga che'ejle nis, na' da' zanch da' chonle.

⁹ Qui gožch Jesúsen' legaque':

—Chbejyichjle da' non Diosen' mandadw gonle cont na'ole costumbr che benach.

¹⁰ Da' Moisésen' gwne': “Le gap bala'an xaxna'le”, na' “Note'teze' še chžia chnite' xaxne'e, cheyala' gate'.”

¹¹ Perw le'e žale to bene' guac ye'e xaxne'e: “Bibi de gona' gaclena' le'e, le yogo' da' de chia' naquen Corbán” (zeje diža', ba bnežjuen' lo na' Dios).

¹² Na' žale cate' to bene' že' ba naquen lo na' Diosen' nach bich cheyala' gaclen xaxne'e.

¹³ Dan' žale ca' chzoale ca'ale dan' ža Diosen' na' con chonxenle costumbr gole che da' xozxta'ole ca'. Na' da' zanch dan' nac ca' chonle.

¹⁴ Da' yoble gox Jesúsen' bene' ca', na' gože' legaque':

—Yogo'le le gwzenag chia', na' le šejni'i.

¹⁵ Bite'teze da' ye'ej gagw benachen', bi nacho len chonen cont lažda'ogüe' bi naquen xilaže' len Diosen'. Dan' chchoj lo' lažda'ogüen', lenna' chonen cont lažda'ogüe' bi naquen xilaže' len Diosen'.

16 Le'e žia nagle da' chene, le gwzenag xtiža'na'.

17 Cate' bsan Jesúsen' bich bšaljlene' beṇe' ca' na' beyo'e lo' yo'o, nach beṇe' ca' zjanaque' le' txen gosenabde' le' bi zejen dan' gože' legaque'.

18 Na' Jesúsen' gože' legaque':

—¿Lecze len le'e bi chejni'ile? ¿Bi chejni'ile gague da' ye'ej gagw beṇachen' chonen cont lažda'ogüe' bi naquen xilaže' len Diosen'?

19 Le da' che'ej chagw beṇachen' gague cho'on lo' lažda'ogüen', san lo' li'en cho'on, na' chžin hor cheden.

Na' da' gwne' ca' zeje diža' bite'teze yela' guagw nacczen xilaže'.

20 Na' lecze gwne':

—Xbab da' yo'o lo' yichjlaždao' beṇachen', lenna' chonen cont lažda'ogaque' bi zjanaquen xilaže' len Diosen'.

21 Le lo' yichjlaždao' beṇachen' chchoj xbab mal ca da' žan yesone' da' quinga: yesata'lene' no'ole bi nac xo'olgaque' o beṇe' byo bi nac beṇe' čhegaque', gwzoa xtogaque', yesote' beṇe',

22 yesone' gwban, yesezelaže' gata' čhegaque' da' de čhe beṇe' yoble, yesone' da' mal, yeseziye'e beṇe', yesone' bichle da' nac da' yela' zto', yesacxi'ede' beṇe', yeseneye'e čhe beṇe', yesaque' beṇe' ya'laže', yesone' xbab da' bi zaca'.

23 Yogo' da' mal qui chesechojen lo' laždao' beṇach na' chonen cont bi nac lažda'ogaque' xilaže' len Diosen'.

*To no'ol zito' gwyejnilaže' Jesúsen'
(Mt. 15:21-28)*

24 Na' beza' Jesúsen' na' gwyeje' distritw gan' mbane ciuda Tiro na' ciuda Sidón. Na' gwyo'e to

lo' yo'o na' gocláže' nono neze, perw bi goc gone' cont bi gosenezde'.

²⁵ Cate la' gwnezete xna' to bi' no'ole bi' yo'o nyazbe' da' xigüen', na' gwyeje' na' bzoa xibe' xni'a Jesúsén'.

²⁶ No'olen' goque' bene' zito', no'ole Sirofenicia. Gwyeje' gwñabde' Jesúsén' yebeje' da' xigüe' yo'o nyaz bi' no'ol chen'.

²⁷ Na' Jesúsén' gože'ne':

—Yogo'ze bene' zgua'tec chnežjue' da' chagw xi'ine'. Bi naquen güen yeque'e yela' guagw che xi'ine' na' gwnežjuen' yesagw beco' ca'.

²⁸ Na' no'olen' gože'ne':

—Leczedo' can' gwnaon' Xana', perw lecze guague gagw beco' be chi' xan mes bla'a da' chlažo' lo yo.

²⁹ Nach Jesúsén' gože'ne':

—Nacczen can' gwnaon', guac yeyejo', ba bechoj da' xigüen' yo'o nyaz bi' no'ol chion'.

³⁰ Cate' bežin ližen' ble'ede' de bi' no'ol daon' to lo cam, na' ba bechoj da' xigüen' yo'o nyazbe'.

Jesúsén' beyone' to bene' cuež, bene' lecze bi goc nie'

³¹ Jesúsén' bezse'e gan' mbane Tiro na' gwdie' gan' nzi' Sidón na' yež ca' gan' mbane Decápolis, na' bežine' cho'a nisdao' che Galilea.

³² Na' jasesane' to bene' byo bene' cuež na' bi goc nie', na' gosenabe' xoa na' Jesúsén' yichje'.

³³ Nach Jesúsén' gwche'ene' late' lchojiže' ga nono bene' nita', na' bde xbene' lo' nague' na' bži'en xene' na' gwdane' ložen'.

³⁴ Nach gwne'e le'e yaba, bebande', na' gwne':

—¡Efata! —zeje diža': ¡Byaljo!

³⁵ Nach nag bena' besyeyaljon na' goc bende', na' lecze beyac ložen' na' goc gwñie' binlo.

³⁶ Na' Jesúsen' gože' beñe' ca' nono yese'e ca', perw la'czla' gože' legaque' ca', nachle goso'e diža' can' goca'.

³⁷ Na' leca besyebande', na' gosene':

—Yogon' chone' binlo; chacte chone' cont chesyeyene beñe' cuež ca' na' beñe' ca' bi chac yeseñe' chesyenie'.

8

Jesúsen' cho'e da' chagw tap mil beñe' (Mt. 15:32-39)

¹ Ca tiempa' besežagchgua beñe' zan na' bibi de yesagüe'. Nach Jesúsen' goxe' beñe' ca' gwleje' cont zjanaque' txen len le' na' gože' legaque':

² —Cheyaše'da' beñe' qui, le ba goc šone ža zjanite' nga len neda' na' bibi de yesagüe'.

³ Še yesela'ne' ližgaque' na' bina' yesagüe', chanez yesego'one' yesecholde', le bale' za'aque' zito'.

⁴ Nach beñe' ca' zjanaque' le' txen gose'ene':

—¿Nacxe goncho güe' chone' da' yesagüe' latje nga ga nono beñe' nita'?

⁵ Na' Jesúsen' gwñabde' legaque':

—¿Gaca' yetextilen' de chele?

Na' legaque' gose'ene':

—Gažen.

⁶ Nach bene' mandadw yesebe' yogo'lol ben' nitan' lo yo, na' gwxi'e da' gaž yetextil ca' na' be'e yela' choxcen che Dios, nach bzojjen' bnežjuen' beñe' ca' zjanaque' le' txen na' legaque' goseyisen' che yogo'lol beñe' nita' na'.

⁷ Leze zjano'e to chop bel ya'a, na' Jesúsen' be'e yela' choxclen che Diosen' che bel ya'a ca' na' leze goseyisen' che yogo'lol bene'.

⁸ Na' yogüe' gosagüe' na' goseljde'. Gwdena' bososše'e yegaže žome len late' güeje yela' guagw da' bega'an.

⁹ Bene' ca' gosagon' zjanaque' ca do tap mil bene'. Cate' ba besyedagüe', Jesúsen' gože' legaque': —“Nayežagcho”,

¹⁰ na' gwyo'e lo' barcon' len bene' ca' zjanaque' le' txen na' gwyeje' do gan' mbane yež da' nzi Dalmanuta.

Bene' fariseo ca' gosaclaže' gon Jesúsen' to yela' guac da' yesele'ede' le'e yaba

(Mt. 16:1-4; Lc. 12:54-56)

¹¹ Na' bene' fariseo ca' gosezolagüe' chesedildiže' len Jesúsen'. Na' da' gosaclaže' yesagüe' xya che' nach gosenabde'ne' gone' to yela' guac da' yesele'ede' le'e yaba cont yesenezde' še da' licze Diosa' gwsele' le'.

¹² Jesúsen' bebanchgüede' na' gwne':

—Ba ble'ele chona' yela' guac. ¿Bixchen' chñable to yela' guac da' le'ele cont nezele še Diosen' gwsele' neda'? Da' li žia' le'e, bitwbi gona' da' le'ele.

¹³ Nach bcua'ane' legaque' na' beyo'e lo' barcon' beze'e beyeje' yešla'a nisdaon'.

Levadura che bene' fariseo ca'

(Mt. 16:5-12)

¹⁴ Bene' ca' zjanaque' Jesúsen' txen gosanjaže' yeso'e da' yesagüe', na' totec yetextil zjano'e lo' barcon'.

¹⁵ Na' Jesúsen' gože' legaque':

—Le gon xbab, le gwsaca' len levadura che bene' fariseo ca' na' len levadura che Herodes.

16 Nach gosenabe lježe' bixchen' gwne' ca', na' gose' lježe':

—Gwne' ca' le gague bi yetextil checho den'.

17 Jesúsen' gocbe'ede' xbab dan' chesone' na' gože'ne':

—¿Bixchen' chacžejlaže'le da' bibi yetextil de? ¿Biṇa' šejni'ile, neca chache'ele? ¿Nac chach lažda'olen' bi chejle'le?

18 ¿Bi chle'ele len yejlaole, neca chenele len nagle? ¿Bi chjayze'ele?

19 Gwdisa' gayo' yetextil na' goquen che gayo' mil bene', na' ¿bi chjayze'ele yebale žome goc da' becho'onen da' botoble?

Na' legaque' gosene':

—Šižinw žome becho'onen da' botobto'.

20 —¿Chixe caten' gwdisa' gaže yetextilen' lao tap mil bene'? ¿Yebale žome gwža'te dan' botoblen'?

Na' gosene':

—Gaže žomen'.

21 Nach gože' legaque':

—¿Biṇa' šejni'iczele na'a cho'a diža' che dan' chososed chosolo'e bene' fariseo ca'?

Jesúsen' beyone' to bene' lchol bene' Betsaida

22 Gwdechle besežine' Betsaida na' jasesane' to bene' lchol lao Jesúsen', na' gosata'yoede' le' yeyone' le'.

23 Na' bexue' taca' bene' lchola' na' gwleje'ne' yež. Nach gwdebe' xene' yejlagüen' na' gwxoā taquen' yichje' na' gwṇabde'ne' še chle'ede' late'.

24 Bene' lchola' gwne'e na' gwne':

—Chle'eda' be_{ne}' , na' chle'eda'ne' ca yag, perw chesa'aque'.

²⁵ Nach Jesúsen' be_{xoa} taque' yejlagüen' da' yoble, na' gw_{na}'ya_{ne}' ben' na' beyaque', bele'etede' yogo' bin_{lo}.

²⁶ Nach Jesúsen' bese_{le}' le' liže', gože'ne':

—Bi yeyo'o lagüe yežen', ne_{ca} no yo'o da' nga.

Pedron' gwne' Jesúsen' naque' Cristo ben' gwlej Diosen' cont nabi'e

(Mt. 16:13-20; Lc. 9:18-21)

²⁷ Gwdena' gwyej Jesúsen' len be_{ne}' ca' zjanaque' le' txen yež dao' ca' zjachi' do ga mbane ciuda da' nzi' Cesarea de Filipo. Na' chanez gw_{nabde}' be_{ne}' ca' zja'aclen le':

—¿Bi chesena be_{ne}'? ¿Non' naca' neda'?

²⁸ Legaque' gose'ene':

—Ba_{le}' chesene' naco' Juan ben' bzoa be_{ne}' nis, yeba_{le}' chesene' naco' Elías, na' yeba_{le}' chesene' naco' yeto be_{ne}' be' xtiža' Dios cani'.

²⁹ Na' gw_{nabde}' legaque':

—¿Chixe le'e? ¿no žale naca'?

Pedron' gože' le':

—Len' naco' Cristo ben' gwlej Diosen' cont nabi'o.

³⁰ Nach Jesúsen' gože' legaque' nono yese'e ca'.

Jesúsen' gw_{dixjue}'ede' gate'

(Mt. 16:21-28; Lc. 9:22-27)

³¹ Na' gwzolao Jesúsen' bzejni'ide' legaque' can' gac chen', gože'ne':

—Da' zan da' saca'zi'a neda' naca' ben' gwse_{la}' Diosen' golja' be_{nach}. Na' be_{ne}' bla_o ca' chesen-
abia' nación chechon' na' b_{xoz} gw_{nabia}' ca' na' be_{ne}' ca' chososed chosolo'e dan' bzoj da' Moisés

bi yesele'ede' neda' güen da' bi chesejle'e chia', na' yesote' neda', perw gacch šone ža yebana' ladjo bene' guat ca'.

³² Da' nga gwnen' zaca'laon. Na' Pedron' gwche'e Jesúsen' ga nac lchojiže' na' gwzologüe' chdile' le' dan' gwne' ca'.

³³ Perw Jesúsen' gwyechje' na' gwne'e bene' ca' zjanaque' le' txen, na' gwdile' Pedron', gože'ne':

—iGwcuase ca'ale Satanás! Bi nsa'o xbab che Diosen' san nsa'o xbab che benach.

³⁴ Nach Jesúsen' goxe' bene' ca' zjanaque' le' txen na' yezica'chle bene' na' gože'ne':

—Note'teze bene' še chaclaže' gague' neda' txen, cheyala' chojyichj cuine', la'czla' saca'zi'e, na' gone' can' nia' neda'.

³⁵ Note'teze bene' chacde' gone' cont bi saca'zi'e o cont nono yesot le', benan' cuiayi', na' note'teze bene' chzanlaže' cuine' saca'zi'e o gate' ne chia' neda' o neche xtiža' Diosen', ba de yela' mban che' toli tocanē.

³⁶ ¿Bixe zejenna' to bene' nabi'e doxen yežlion' na' cuiaye'e bi gata' yela' mban che' toli tocanē?

³⁷ Le bi zoa nacle gon benachen' chixjue' cont gata' yela' mban che' toli tocanē.

³⁸ Bene' ca' že' na'a bi chesejnilaže' Diosen' na' chesonchgüe' da' xinj. Na' note'teze bene' še cheto'ede' par ye'e lježe' chejnilaže' neda', na' še cheto'ede' par gwzenague' xtižan', lecze ca' neda' yeto'eda' che' par nia' naque' neda' txen, neda' naca' ben' gwsela' Dios golja' benach. Yeto'eda' che' cate' yida' da' yoble nsa'a yela' zaca' juisyw che Xa' Diosen' na' nchia' bene' ca' zjanac angl che'.

9

¹ Lecze gož Jesúsen' legaque':

—Da' li žia' le'e, ba_lle nita'le nga na'a bi_na' gatle cate' žin ža le'ele Diosen' gwlo'e ye_la' guac xen čhen' can' chnabi'en'.

Bša' Jesúsen' ca goque'
(Mt. 17:1-13; Lc. 9:28-36)

² Gwde xop ža, Jesúsen' gwche'e Pedro, Jacobo na' Juan na' ja'aque' to lo ya'a sibe, na' nono nochle ja'ac len legaque'. Na' nite' besele'ede' bža' ca goc Jesúsen'.

³ Xa_lane' goquen da' šiš xila', gocten ca da' chactite; la' čhibcho lache' yežlio nga bi yechojen gaquen šiš xila' catequen' goc xa_lane'.

⁴ Na' concze besele'ede' da' Elías na' da' Moisés chosošalje' len Jesúsen'.

⁵ Nach Pedron' gože' Jesúsen':

—Maestro, j_leca güenna' zoacho nga! Gonto' šone ranšw, to čchio', to čhe Moisés, na' yeto čhe Elías.

⁶ Le be_ne' ca' zja'aclen Jesúsen' besežebchgüe', na' Pedroa' bi chacbe'ede' bin' že'.

⁷ Nach gwche' to bejw gan' niten' gwyečhjen legaque', na' lo' bejon' gosende' gwna Diosen':

—Bengan' Xi'ina' be_ne' chacda'; le gwzenag čhe'.

⁸ Na' cate' gosen_e'e cue'ej cuiten' notno besele'ede', san toze Jesúsen' zie'.

⁹ Na' šlac chesyeyetje' lo ya'an, Jesúsen' gože' legaque' notno yesi'e ca nac dan' besele'eden'. Gože'ne':

—Cate'ch ba bebana' ladjo be_ne' guat ca', nedan' naca' ben' gwsela' Dios golja' be_načh, cana' güe'le diža' čhen.

10 Da'nan' gosezoe' šize, nono gose'e ca', perw na' gosenabe lježe' bi zejen dan' gwne' yebane' ladjo beṇe' guat ca'.

11 Nach gose'e Jesúsen':

—Beṇe' ca' chososed chosolo'e dan' bzoj da' Moisés chososedde' neto' chesene' zgua'tec da' Elías ben' gwzoa cani' cheyaḷa' yide' da' yoble cate' za' yedenabia' ben' seḷa' Diosen'. ¿Bixchen' chesene' ca'?

12 Na' boži'e xtižen':

—Da' liczen' zgua'tec Elíasna' yide' na' yeyo'e xneze yogo'loḷ da' de yežlio nga. ¿Nezele bin' ža gan' nyoj Xtiža' Diosen' chia' neda' naca' ben' gwsela' Dios golja' beṇach? Žan saca'zi'a na' beṇe' zan bi yesejnilaže' neda'.

13 Na' žia' le'e, Elías ba bide' na' gosonde' le' con ca gosaclaže', can' nyoj le'e Xtiža' Diosen' žan can' cheyaḷa' gac che'.

*Jesúsen' beyone' to bi' yo'o nyazbe' da' xigüe'
(Mt. 17:14-21; Lc. 9:37-43)*

14 Gwdena' besyežine' gan' nita' yezica'chle beṇe' ca' zjanaque' Jesúsen' txen, na' besele'ede' beṇe' zan zjanita' zjanyechjde' legaque', na' len beṇe' ca' chososed chosolo'ede' dan' bzoj da' Moisés chesedildiže' len legaque'.

15 Na' cate' beṇe' ca' besele'ede' Jesúsen', yogüe' besyežejde' na' ja'acsese' bosoguape' le' tiox.

16 Nach gwṇabde' legaque':

—¿Bin' chdildiža'le len beṇe' ca'?

17 Na' to beṇe' nchixe beṇe' ca' boži'e xtižen', gwne':

—Maestro, zedesana' bi' chia' nga, yo'o nyazbe' da' xigüe' na' benen cont bi chac ṇebe'.

18 Gate'teze chdabe' chzenen lebe' na' chcho'onen lebe' lo yo, na' chbia bžina' cho'abe' na' chagwxej laybe'. Na' ca' zej chedo fuerz chebe'. Na' ba gwṇaba' lao bene' qui zjanaque' le' txen yesyebeje' da' xigüe' yo'o nyazbe', perw bitw gosaque'.

19 Na' Jesúsen' gože' bene' ca' že'na':

—¡Le'e bene' bi chejnilaže'! ¿Šna chyažjen soalena' le'e cont šejnilaže'le? ¿Batca' zelao ṇa'lagua' le'e? Le yedesambe' nga.

20 Na' jasesane'be', na' cate' da' xigüen' ble'en Jesúsen', benen gwyazbe' šon, na' gwbiṇbe' lo yo, chbiṇ chtoṇbe' na' chbia bžina' cho'abe'.

21 Nach Jesúsen' gwṇabde' xaben':

—¿Bal iz ba goc chache' ca'?

Na' xaben' gwne':

—Cate' nache' bida'ote gwzolao chache' ca'.

22 Na' zan ṇi'a da' xigüen' chzalan' lebe' lo yi' na' lo nis cont goten lebe'. Da'nan' še guac yeyono'be', beyaše'sque neto' na' beyombe'.

23 Jesúsen' gože'ne':

—Cheyala' šejnilažo' neda', le yogo' da' chzelaže' bene' chesejnilaže' neda' chaquen.

24 Nach xaben' gwne' zižje:

—¡Chejnilaža' le', goclen neda' šejnilaže'cha'!

25 Na' cate' Jesúsen' ble'ede' chesežagchgua bene', gwdile' da' xigüen' gožen':

—Da' xigüe', le' chono' cont bi' nga bi chenebe' na' bi chac nebe', neda' žia' yechojo'. Bsan bi' nga, na' bich yeyo'o yiṇhlažda'oben'.

26 Na' da' xigüen' benen ga bosya'abe' na' benen ga gwyazbe' ca' yeto šon, nach bechojen. Na' bin'

bega'anbe' ca bi' guat, na' zan bene' gosene' got-ben'.

²⁷ Perw Jesúsen' be_xue' taca'ben' cont beyasbe', nach gwzechabe'.

²⁸ Nach cate' Jesúsen' gwyo'e to lo' yo'o, bene' ca' zjanaque' le' txen gosebeje' le' ca to lchojiže' na' gosenabde' le':

—¿Bixchen' bi goc neto' yebejto' da' xigüen'?

²⁹ Na' gože'ne':

—Cont yechoj da' xigüen' nac ca' cheya_la' gonle gwbas na' soatezle yo_l güižle Dios.

Da'yoble Jesúsen' gwne' gate'

(Mt. 17:22-23; Lc. 9:43-45)

³⁰ Cate' besyeya'aque' na', besyedia' distritw Galilea. Na' Jesúsen' goclaže' nono yeseneze,

³¹ le chzejni'ide' bene' ca' zjanaque' le' txen, che'e le_gaque':

—Nedan' naca' ben' gwsela' Dios golja' benach, yosodie' neda' lo' na' bene' yesote'nda', perw yeyon ža yebana' ladjo bene' guat ca'.

³² Perw bi gosejni'ide' bin' gože' le_gaque', na' besežebe' yesenabde'ne'.

Gosedildiže' gosene' noen' nac bene' blaoch

(Mt. 18:1-5; Lc. 9:46-48)

³³ Na' besežine' ciuda da' nzi' Capernaum, na' cate' besežine' yo'o gan' zoa Jesúsen' gw_nabde' le_gaque':

—¿Bixchen' chdildiža'le chanez'?

³⁴ Perw con gosenite' šižize, le chanezan' gosedildiže' gosene' noen' nac bene' blaoch.

³⁵ Nach Jesúsen' gwchi'e na' goxe' bene' šižinw ca' zjanaque' le' txen, na' gože' le_gaque':

—Še no le'e chaclaže'le gacle bene' žialao, cheyala' gonle xbab bibi zaca'tecle, na' cheyala' gon cuinle ca xmos yogo' bene' lježle.

³⁶ Nach be_{xue}' to bidao' na' bzeche'be' gachol legaque', na' gwlene'be' na' gože' legaque':

³⁷ —Note'teze bene' chone' güen len to bidao' ca bi' nga ne_{che} da' chejnilaže' neda', choncze' güen len neda'; na' noteze' chon güen len neda', choncze' güen len Dios ben' gwsela' neda'.

Bene' bi chon chio' contr, txencza' chone' chio'
(Mt. 10:42; Lc. 9:49-50)

³⁸ Nach Juanna' gože'ne':

—Maestro, bežagto' to bene' cho'e lao' na' chebeje' da' xigüe' da' yo'o nyaz bene', na' bžonto' gone' ca', le bi chone' chio' txen.

³⁹ Na' Jesús'en' gwne':

—Bi gwžonle gone' ca', le gague zoa to bene' gone' yela' guac cho'e lan', yeyoža' ne' yela' ya' chia'.

⁴⁰ Le bene' bi chone' chio' contr, txencza' chone' chio'.

⁴¹ Čhnia' le'e to da' zejen, note'teze bene' gone' le'e la' to xiga'ze nis da' ye'ejle ne_{che} chejnilaže' neda' na' ne_{che} ne_{zde}' le'e nacle txen len neda', Diosen' gone' cont soacze' mbalaz da' ba goclene' le'e.

Bitw co'yela'cho bene' gone' da' xinj
(Mt. 18:6-9; Lc. 17:1-2)

⁴² Note'teze bene' chon cont lažo' to bene' za' gwzomagüe' chejnilaže' neda' gone' da' xinj, yejni'acle yosocheje' yene' to yiše xen na' yosozale'ne' lo' nisaon' clal ca da' gone' cont lažo' bene' yoble gone' da' xinjen'.

43 Na' še yeṇa'len' chonen cont gonle da' xinj, cheyaḷa' cuejyichjle da' malen' chonle. Yejni'a bibi na'le zoa clēl ca gonle da' xinjen' len len. Na' yejni'a šjayzoale len Diosen' toli tocaṇe bi zoa šla'a taca'le clēl ca yeyejle lo yi' gabil dan' bi cheyol chenit nya' cuerp chelen'.

44 Na' gabilen' neca chesat bzogan', neca cheyol yin'.

45 Na' še ni'alen' chonen ga gonle da' xinj, lecze cheyaḷa' cuejyichjle da' malen' chonle. Yejni'a bibi ni'alen' zoa clēl ca gonle da' xinjen' len len. Na' yejni'a šjayzoale len Diosen' toli tocaṇe bi zoa šla'a ni'alen', clēl ca yeyejle lo' yi' gabil dan' bi' cheyol chenit nya' cuerp chelen'.

46 Na' gabilen' bzoga' ca' bi chesatba', neca cheyol yin'.

47 Na' še yejlaolen' chonen cont gonle da' xinj, cheyaḷa' cuejyichle da' malen' chonlen'. Yejni'a bibi yejlaolen' žia clēl ca gonle da' xinjen' len len. Na' yejni'a šjayzoale len Diosen' toli tocaṇe zoa šla'aze yejlaole clēl ca yežinle lo yi' gabilen' žia chop la'a yejlaolen'.

48 Ca nac gabilen', bi chesat bzogan', neca cheyol yin'.

49 'Le dan' chyi chzaca'le yežlio nga chzejni'in le'e cont bi yeyejle lo yi' gabil. Na' da' chyi chzaca'le zaca'leben ca zede' da' cheyaḷa' chixe' yezj yogo' ni'a cate' chjasesane' yezj lao Diosen'.

50 Na' zeden' naquen güen, perw še bich bi zxi' naquen, ¿nacxe goncho cont yeyaquen zxi' da' yoble? Na' le'e cheyaḷa' gwyo gwčhejlaže'le dan' chyi chzaca'le na' cheyaḷa' soale binlo tole yetole,

na' še soale ca', zaca'leble ca to yela' guagw da' yo'o zede'.

10

Jesúsen' bzejni'ide' bi cheyala' yela'acho len no'ol checho

(Mt. 19:1-12; Lc. 16:18)

¹ Jesúsen' beze'e Capernaum na' gweyjeche' gan' mbane distritw Judean' na' yešla'a yegw Jordánna'. Na' da' yoble besežag bene' zan gan' zoen' na' lecze da' yoble bsd blo'ede' legaque' con can' choncze'.

² Nach bal bene' fariseo ca' ja'aque' gan' zoa Jesúsen' gosaclaže' yesebeje'ne' diža' da' yosočhine' cont yosožie'ne' xya chol, na' gosenabde'ne' še guac to bene' yele'e len no'ol che'.

³ Na' Jesúsen' boži'e xtižen', gwne':

—Ca nac dan' bzoj da' Moisésen', žnac bene' mandadw gonle?

⁴ Legaque' gosene':

—Moisésen' gwne' cate' to bene' yele'e len no'ol chen' cheyala' chas to yiš da' gwnežjue' no'ol che' ga güe'en diža' besyele'ena'.

⁵ Nach Jesúsen' gože' legaque':

—Moisésen' gwne' gac gonle ca' lagüe dan' nacle bene' güedenag len Diosen'.

⁶ Perw cate' gwxe yežlion', cate' bxe Diosen' yogo' da' de, bi goquen ca'. Le nyojen žan: “Bene' legaque', to bene' byo na' to no'ole.”

⁷ “Da'nan' bene' byon' gwsane' xaxne'e cont soalene' no'ol chen',

⁸ na' chope' yesaque' ca toz bene'.” Na' ca' bich yesac chope' san toze'.

9 Da'nan' bi cheya_{la}' yesyele'e, le Diosen' ba bcode' legaque'.

10 Cate' besyežine' yo'o, be_{ne}' ca' zjanaque' le' txen da' yoble gosen_{abde}'ne' bi zejen dan' ba gwne'.

11 Na' Jesúsen' gože' legaque':

—Note'teze be_{ne}' chele'e len no'ol che' na' cheque'e no'ol yoble, chone' da' xi_{nj}, le toz ca naquen šaca' gata'lene' no'ol che be_{ne}' yoble.

12 Na' še no'olen' chsane' be_{ne}' chen' na' cheque'e be_{ne}' yoble, lecze toz can' nac da' xi_{nj} da' chonen'.

Jesúsen' gw_{nabde}' Diosen' gac güen che bidao' ca' besežag

(Mt. 19:13-15; Lc. 18:15-17)

13 Nach jasesane' bi' bixjw lao Jesúsen' cont xoa ne'e yichjgacbe', perw be_{ne}' ca' zjanaque' le' txen gosedi_{le}' be_{ne}' ca' zjanche'ebe'.

14 Na' cate' ble'e Jesúsen' can' gosonen' na' bže'e legaque' na' gože'ne':

—Le güe' latje yesid bidao' ca' lagua' nga na' bi gwžonle, le be_{ne}' ca' zjanac ca bidao' quinga, legaque' chosozenague' che Diosen' cont chnabi'e yichjlažda'ogaque'.

15 Da' li žia' le'e, note'teze be_{ne}' cheya_{la}' yosozenague' che Diosen' ca cheson bidao' cate' chosozenagbe' che xaxna'be', le be_{ne}' bi yosozenague' ca', gwbat nabia' Diosen' yichjlažda'ogaque'.

16 Nach gwlene' to to bidao' ca' na' gw_{nabde}' Diosen' gac güen chebe', gwxoa taquen' yichjbe'.

To be_{ne}' güego' bšaljlene' Jesúsen'

(Mt. 19:16-30; Lc. 18:18-30)

17 Cate' Jesúsen' gwze'e ngüe'e nez, chxonjses to beñe' jazoa xibe' lagüen' na' gwñabde'ne':

—Maestro, le' naco' beñe' güen. ¿Bi cheyała' gona' cont gata' yela' mban chia' toli' tocane'?

18 Jesúsen' gože'ne':

—¿Bixchen' žo' naca' beñe' güen? Toze beñe' güen zoa, na' len' Dios.

19 Le' ñezdo' da' none' mandadw goncho: “Bi gata'lenle' no'ol bi nac no'ol chele o beñe' byo beñe' bi nac beñe' chele; nono gotle; bi cuanle; bi güe'le diža' güenlaže' che beñe' lježle; bi siye'le beñe'; le gap bala'an xaxña'le.”

20 Na' boži'e xtižen':

—Maestro, yogo' da' quinga chzenaga', gwzola'gua' chonczan' cate' ñe' nactia' bidao'.

21 Jesúsen' gwñe'e bene' güegon' na' chacde' le', na' gože'ne':

—Zoa to da' ñe' chyažjen gono': šjayeto' yogo' da' de chio' na' da' le'edo' chen bnežjon beñe' yaše'. Nach še gono' ca', cate' yežino' yaba gan' zoa Diosen' da' zaca'ch gata' chio'. Na' še ba beyož beno' can' žia' le', nach yo'o gaco' neda' txen la' saca'zi'o.

22 Na' cate' bene ben' dan' gwna Jesúsen', gocde' leca zdebe naquen gone' can' gože'ne', na' beza'yaše', le beñe' gwñi'achgua goque'.

23 Nach Jesúsen' gwñe'e do cue'ej cuite' na' gože' beñe' ca' zjanaque' le' txen:

—Leca zdeb naquen to beñe' gwñi'a gwzenague' che Diosen' cont Diosen' ñabi'e yichjlažda'ogüe'.

24 Na' beñe' ca' zjanaque' le' txen besyebande' can' gwnen', perw Jesúsen' goze'e legaque':

—Xi'ina', bene' chesacde' zaca'chgua yela' gwñi'a c̄hegaquen', leca zdebe naquen yosozenague' c̄he Diosen' cont nabi'e yichjlažda'ogaquen'.

²⁵ Bedao'ch te to be xen be nzi' camello to lo' nag yeše' cl̄el ca to bene' gwñi'a gwzenague' c̄he Dios cont Diosen' nabi'e yichjlažda'ogüe'.

²⁶ Cate' gosende' dan' gwne', leca besyebande' na' gose' l̄ježe':

—¿Noxen' šjayzoa len Diosen' še ca'?

²⁷ Jesúsen' gwñe'e legaque' na' gože'ne':

—Bibi de da' gac yeson benachen' cont šjasyenite' len Diosen', perw Diosen' guac gonen'; le bi zoa da' n̄acho da' bi gac gon Dios.

²⁸ Nach Pedron' gože'ne':

—Neto' ba gwlejjyichjto' yogo' da' de c̄heto' cont nacto' le' txen.

²⁹ Jesúsen' boži'e xtižen':

—Da' li žia' le', note'teze bene' ba gwlejjyichje' liže', bene' biše', zane', xe', xne'e, no'ol c̄he', xi'ine', o yežlio c̄he' ne c̄hia' neda' na' neche chzenague' xtižan',

³⁰ yežlio nga yonežjo Diosen' le' to gayoa ca'te'le, yo'o, biše', zane', xne'e, xi'ine' na' yežlio, la'czla' yesebe'na'ogüe' le'. Na' cate' yežine' yaban' gata' yela' mban' c̄he' toli tocañe.

³¹ Perw zan bene' zjanaque' bene' žialao na'a, gwžin ža cate' yesaque' bene' bzebe; na' bene' zjanaque' bene' bzebe na'a, gwžin ža cate' yesaque' bene' žialao.

Da' yoble Jesúsen' gwne' yesote'ne'

(Mt. 20:17-19; Lc. 18:31-34)

³² Zjangüe'e nez zja'aque' bso dan' zoa gala'ze Jerusalenna' na' Jesúsen' žialagüe' lao bene' ca'

zjanaque' le' txen. Legaque' chesyebande' na' do chesežebze' zjana'ogüe' le'. Nach da' yoble Jesúsen' goxe' beñe' šižinw ca' ca'ale ga nac lchojiže' na' gože' legaque' can' gac chen'.

³³ Gože'ne':

—Na'a ba zejcho Jerusalén gan' yesone' neda' lo na' b̄xoz gwnabia' ca' na' lo na' beñe' ca' chososed chosolo'ede' dan' bzoj da' Moisés, na' yesechoglagüen' chia' yesote' neda' na' yesone'nda' lo na' beñe' bi zjanaque' beñe' Israel, nedan' naca' ben' gwsela' Dios golja' beñach.

³⁴ Yesezi'diže' neda', yesot yeseyine' neda', gosoži'enda' xene', na' yesote' neda', perw yeyon za yebana' ladjo beñe' guat ca'.

Jacobo na' Juan gosenabe' to goclen lao Jesúsen' (Mt. 20:20-28)

³⁵ Nach Jacobo len Juan, beñe' ca' zjanac xi'in Zebedeo, gosebigue' cuit Jesúsen' na' gose'ene':

—Maestro, chaclaže'to' gono' to goclen da' nabto'.

³⁶ Na' gwnabe Jesúsen' legaque':

—¿Bi che'nele gona'?

³⁷ Na' gose'ene':

—Ben cont cue'to' šla'a güeje cuito'na' cate' solao nabi'o.

³⁸ Nach Jesúsen' gože'ne':

—Le'e cabi nezele bi dan' chñable. ¿Gwçhejlaže'le tele yela' zi' yela' ya' ca dan' tia' neda' na' gac chele can' gac chia'?

³⁹ Legaque' gose'ene':

—Gwçhejlaže'to'.

Na' Jesúsen' gože' legaque':

—Da' licze tele yela' zi' yela' ya' ca dan' tia' neda' na' gac chele can' gac chian'.

⁴⁰ Perw bi naquen lo na' nia' non' cue' cui-tan' cate' žin ža nabi'a, san yesebe' bene' ba mbej Diosen' gaquen che'.

⁴¹ Cate' yeši bene' ca' zjanaque' le' txen gosende' xtiža'gaquen', beseloque' Jacobon' na' Juanna'.

⁴² Perw Jesúsen' goxe' yogüe' cont gosebigue' laogüen' na' gože' legaque':

—Neczezele bene' zjambeje' cont chesenabi'e to to nación na' bene' blao ca' chesone' byen chosozenag bene' chegaque'.

⁴³ Perw bi naquen ca' len le'e. San note'tezle chaclaže'le gacle bene' blao, cheyala' gwzexjwlaže'le gaclenle bene' lježle.

⁴⁴ Na' note'tezle chaclaže'le gacle bene' žialao, cheyala' gon cuinle ca xmos yogo' bene' lježle.

⁴⁵ Le lencze neda', gwsela' Diosen' neda' golja' beňach, gague za'a cont yesaclen bene' neda', san za'a cont gaclena' bene', na' gwnežjw cuina' yesote' neda' neče xtoła' beňachen'.

Jesúsen' beyone' to bene' lchol ben' gože' Bartimeo (Mt. 20:29-34; Lc. 18:35-43)

⁴⁶ Nach besežine' Jericó. Na' cate' Jesúsen' ba beze'e ciudan' len bene' ca' zjanaque' le' txen na' len yezanch bene', do cho'a ciudan' chi' to bene' lchol chanez chnabe' yosonežjo bene' le' con gaca' da' chesezande'. Bena' le' Bartimeo na' naque' xi'in to bene' le' Timeo.

⁴⁷ Na' bene' lchola' cate' gocbe'ede' gwde Jesús bene' Nazaret gan' chi'ena', gwzolagüe' gwne' zižje gwne':

—iJesús, xi'in diaža che da' rey David, beyaše'laže'sca neda'!

⁴⁸ Bene' zan gosedi'e' le' cont bich yosye'e, perw bosya'adiache' gwne':

—iXi'in diaža che da' rey David, beyaše'laže'sca neda'!

⁴⁹ Nach Jesúsen' gwleze' na' gwne':

—Le gaxe'.

Nach gosaxe' bene' lchola' na' gose'ene':

—Benchachlažo', gwzoža', le chaxe' le'.

⁵⁰ Nach gwcho'one' lache' da' nxo'a cože' na' bxite' jabigue' lao Jesúsen'.

⁵¹ Nach Jesúsen' gwnabde' le':

—¿Bi chaclažo' gonda' le'?

Bene' lchola' boži'e xtižen':

—Maestro, che'nda' yele'eda'.

⁵² Nach Jesúsen' gože'ne':

—Guac yeyejo'. Dan' chejnilažo' neda' ba beyac yejlaguon'.

Na' la' bele'ete bene' lchola', na' gwda'ogüe' Jesúsen'.

11

Jesúsen' gwyo'e ciuda Jerusalén

(Mt. 21:1-11; Lc. 19:28-40; Jn. 12:12-19)

¹ Cate' ba zoa yesežine' Jerusalén, besežine' gan' zjachi' yež dan' zjanzi' Betfagé na' Betania na' gan' zoa ya'a da' nzi' Ya'a Olivos. Na' Jesúsen' gwsele' chop bene' ca' zjanaque' le' txen mandadw,

² gožgaque'ne':

—Le šja'ac yež dan' chi' gała'ze, na' cate' žinlen' na' yeže'lele to burr dao' da'ba' yag be nono na' cuia. Le sežba' na' le che'ba' nga.

3 Na' še no chṇab biḅhen' chonle ca', le ye'e: "Xanto' chyažjde'ba'", na' la' gwzantecze'ba'.

4 Nach gosa'aque', na' besele'ede' burron' da'ba' yag to cho'a yo'o cuit ga xoa to nez, na' goseše'ba'.

5 Na' bal bene' ca' nita' na' gose'ene':

—¿Bixen' chonle? ¿Bixchen' chšežle burron'?

6 Nach bosyoži'e xtižen' can' gož Jesúsen' legaque', na' goso'e latje goseše'ba' cont goseče'eba'.

7 Nach goseče'e burron' lao Jesúsen' na' go-seḅoa xagaque' cože'ban' na' gwžia Jesúsen' leba'.

8 Na' bene' zan gosonxene' Jesúsen' goseyixjw no xagaque' lo nez cont blej burron' len na' yeba'le' gosechogue' xoze' yag na' goseyixjuen' lo neza'.

9 Bene' zjažialao na' lecze bene' za'ac cože' gose-zolagüe' bososye'e, gosene':

—¡Leca zaca'chgua bengal! ¡Mbalaz ben' za' nga nsela' Xancho Diosen' le' cont nabi'e!

10 ¡Mbalaz yela' gwnabia' che' da' nse'e, le' nabi'e ca da' xozxta'ocho David! ¡Leca zaca'chgua Dios ben' zoa yaban'!

11 Can' goc, Jesúsen' gwyo'e Jerusalén, na' lecze gwyo'e chyo'o che yodao' blaon'. Na' beyož gwne'e yogo'lol da' de na', beyeje' Betania len bene' šižinw ca' ba gwleje' cont zjanaque' le' txen, le ba zoa gal.

*Jesúsen' gwne' gacxi'a yag yixgüigw da' bibi žia
(Mt. 21:18-19)*

12 Beyechj ža cate' besyeya'aque' Betania, Jesúsen' gwdone'.

13 Na' zito' ble'ede' to yag yixgüigw da' žia laga', na' jane'e še žia yaguen' yixgüigw, na' bibi bželde', san laga'ze ca' da' žian, le gague canan' chesebia yixgüigon'.

14 Nach Jesúsen' bol güiže' yag yixgüigon', gožen':
—Noch no gagw da' chbio' le'.

Na' beṇe' ca' zjanaque' le' txen gosende' can' gwnen'.

Jesúsen bešaše' beṇe' ca' cheson ya'a chyo'o yodaon'

(Mt. 21:12-17; Lc. 19:45-48; Jn. 2:13-22)

15 Gwdena' besežine' Jerusalén. Na' cate' gwyo'o Jesúsen' chyo'o yodao' blaon', gwzologüe' bešaše' beṇe' ca' chesote' na' beṇe' chesa'o na'. Na' bchiže' xmes beṇe' ca' chosoša' mechw na' yag ga chesebe' beṇe' ca' chesote' ngolbex.

16 Na' bi be'e latje yesexoa xnez beṇe' zjanao' yoa' chyo'o yodaon'.

17 Na' bsed blo'ede' beṇe' ca' že' na', gože'ne':

—Nyojcze Xtiža' Diosen' žan: “Yesene' ližan' naquen latje gan' šja'ac beṇe' yogo' nación yosol güiže'nda'”, perw le'e ba benlen ca to latje ga že' beṇe' gwban.

18 Na' bχoz gwnabia' ca' na' beṇe' ca' chososed chosolo'e dan' bzoj da' Moisés gosende' can' gwnen', na' goseyljwlaže' nacle yesone' yesote'ne'. Ba chesežebe' Jesúsen', le yogo' beṇe' besyežejde' can' bsed blo'eden'.

19 Perw na' cate' gol, Jesúsen beze'e ciudan'.

Gwbiž yag yixgüigon'

(Mt. 21:20-22)

20 Beyečhj ža šezil, gosodie' na' besele'ede' yag yixgüigon' ba gwbižen lente loen.

21 Nach Pedron' jayze'ede' na' gože' Jesúsen':

—Maestro, gwṇa' yag yixgüigw dan' gwnao' gacxi'an, ba gwbižen.

22 Jesúsen' boži'e xtižen':

—Le šejnilaže' Dios.

23 Da' li žia' le'e, note'teze beṇe' ye'e ya'a nga: “Gwcuase nga na' jayzoa lo' nisdao”, še bi chacžejlaže' lo' yichjlažda'ogüe', san chejnilaže' Diosen', guacczen.

24 Da'nan' žia' le'e, yogo'te da' ṇable cate' chol güižle Dios, le šejle' guaquéczen, na' le gacczen.

25 Na' cate' chol güižle Dios, še zoa da' chac chele len beṇe' yoble, le yezi'xen che', cont lecze ca' Xacho Dios ben' zoa yaba yezi'xene' che xtoła'le.

26 Perw še le'e bi yezi'xenle che beṇe', Xacho Dios beṇe' zoa yaba bi yezi'xene' che xtoła'le.

Yela' gwnabia' che Jesúsen'
(Mt. 21:23-27; Lc. 20:1-8)

27 Nach ja'aque' Jerusalén da' yoble, na' šlac chda Jesúsen' chyo'o yodao' blaon' jasebiga' bꝛoz gwnabia' ca' na' beṇe' ca' chososed chosolo'e dan' bzoj da' Moisés na' len beṇe' gole blao' ca' chesenabi'e naciónṇa'.

28 Na' gosenabde' le':

—¿Bi yela' gwnabia' napo' chono' da' qui? ¿No beṇ yela' gwnabian' cont chonon'?

29 Jesúsen' boži'e xtižen', gwne':

—Leze de to da' nabda' le'e na' še yoži'ile xtižan', nach ṇia' le'e bi yela' gwnabia' chonṇendan'.

30 ¿No gwseła' da' Juanna' bzoe' beṇe' nis? ¿Dios nan' gwsele'ne' še beṇachen'? Le yoži'i xtižan'.

31 Nach legacze' gose' lježe':

—Še ye'chone' Dios gwsele' le', na' ye'e chio': “¿Bixchen' ca gwyejle'le che'?”

32 Bi gac ye'chone' beṇach gwseła' le'.

Gosene' ca' da' besežebe', le yogo'te bene' že' na' gosejle'e Diosen' gwsele' da' Juanna' be'e xtiže'na'.

³³ Nach gose'e Jesúsen':

—Bi nezeto'.

Nach Jesúsen' gože' legaque':

—Lecze neda' bi yapa' le'e bi yela' gwnabian' chonlenda' da' ca'.

12

*Jempl che bene' güen žin ben' gosaque' bene' mal
(Mt. 21:33-46; Lc. 20:9-19)*

¹ Nach Jesúsen' gwzolakü'e choe'lene' legaque' diža' chzoe' jempl, na' gože' legaque':

—Gwzoa to bene' goze' to cue' xen yag uvas na' gwlo'en le'ej. Na' bene' to ga yesesie' uvasen' cont choj xisen', na' bene' yeto da' sibe ca to campanario ga yesecua' bene' yosogüia yesene'e yag ca'.

'Nach bcua'ane' yežlion' lo na' bene' yesonši'e yag uvasen', na' gwze'e gweje' zito'.

² Na' cate' bžin ža yosyotobe' cosešen', gwsele' to xmose' lao bene' ca' nac lo na'gaque' yag uvasen' cont yosonežjue'ne' to tlaw coseš dan' yesyezi'en.

³ Perw na' bene' ca' gosezene' mosen' gosot goseyine'ne', na' to ga'alze' bosyose'ene' bibi gosone'.

⁴ Nach xan yežlion' da' yoble gwsele' yeto xmose'; perw benga bosožie'ne' yej, gosone' güe' yichje' na' gosonde' le' zgot.

⁵ Nach xan yežlion' gwseła'che' yetoe', na' benga gosotecze'ne'. Gwdena' gwseła'che' bene' zan, na' bale' gosot goseyine' le' na' yebale' gosotecze'ne'.

6 'Ne' zoa yeto bene' bina' sele', bena' xi'ine' bene' chacgüede', na' bzebte gwsele' le', le bene' xbab: "Yesezi'e xtižen'."

7 Perw bene' ca' gose' lježe': "Bengan' yega'anlene' yežlio nga cate' gat xen'. Le da gotchone' cont yega'anlenchon."

8 Na' gosezene'ne', gosote'ne', na' besyebeje' cuerp chen' gan' že' yag ca', bosozalen' ga yoble.

9 Nach Jesúsen' gwñabe':

—¿Bi chaquele? ¿Nacxe gon xan yežlion' len bene' ca' bocua'anlene' yag uvas chen'? Šeje' šjetoe' legaque', na' yodie' yežlion' lo na' bene' yoble.

10 '¿Bina' gwlable ga nyoj Xtiža' Diosen'? žan quinga:

Yej dan' bi gosaclače' bene' güen yo'o ca' yosočhine',

len ba naquen yej squin.

11 Da' nga ben Xancho Dios, na' naquen to da' yežejecho.

12 Nach gosaclače' yesezene' Jesúsen', le gosacbe'ede' be'e jemplna' neče dan' bi chesejnilaže' le'. Perw besežebe' še bi yesone bene' ca' nžaguen' legaque', da'nan' bosocua'añe'ne' na' besyeya'aque'.

Ca nac che dan' cheyala' gaxjw

(Mt. 22:15-22; Lc. 20:20-26)

13 Gwdena' gosesele' bal bene' fariseo na' bal bene' ca' goseda' Herodes cont yesebeje' Jesúsen' diža' da' yosode'ede' cont yesagüe' xya che'.

14 Bene' ca' ja'aque' na' gose'ene':

—Maestro, nezeto' zoatezo' cho'o diža' li na' bi chono' cuent bi ža bene', le toze can' chono'

len note'teze be_{ne}'. Na' nezeto' diža' li cho'o chsed chlo'edo' be_{ne}' can' čazlaže' Diosen' goncho. Da'n_{an}' zedenabeto' le' čnaquen binlo no čixjo da' cheya_{la}' čixjo che ben' nac la'zelagüe be_{ne}' gwnabia' ben' či' Roma? čGwdixjwton', še bi čixjwton'?

¹⁵ Jesúsen' gocbe'ede' gague do lažen' chese'ene' ca', san chesaclaže' yeson_{lede}' le' len xtiža' gaquen', nach gože'ne':

—čBixčhen' chaclaže'le yoslažo'le neda' len xtižan'? Le gon neda' to mechw cont na'an.

¹⁶ Na' goso'enen', na' cate' ble'eden' na' Jesúsen' gwnabde' legaque':

—čNo lao dan' da' le'e mechw nga? na' čno la dan' nyoj le'en ni?

Nach bosoyoži'en gose'ene':

—Čhe César ben' nac la'zelagüe be_{ne}' gwnabian' ben' či' ciuda Roman'.

¹⁷ Nach Jesúsen' gože'ne':

—Le gwnežjo be_{ne}' gwnabian' da' nac che be_{ne}' gwnabia', na' le gwnežjo Dios da' nac che Dios.

Na' besyebande' can' boži'e xtižen'.

Gosenabde' le' bi zejen dan' yesyeban be_{ne}' guat ca'

(Mt. 22:23-33; Lc. 20:27-40)

¹⁸ Nach besežin ba_l be_{ne}' saduceos gan' zoa Jesúsen'. Be_{ne}' ca' chesene' be_{ne}' guaten' bich yesyebane'. Nach gosenabde' le', gose'ene':

¹⁹ —Maestro, da' Moisésen' bzoje' can' cheya_{la}' goncho, gwne' še to be_{ne}' byo gate' na' chzeb no'ol čhen' perw na' nono bi' güezeb čhga'an, na' be_{ne}' biše' ben' ba got cheya_{la}' yošagna'lene' no'ol güezeba' cont yesenita' xi'in diaža che da' bišen'.

20 Gosenita' be_{ne}' gosac gaž biše'. Na' be_{ne}' nechua' bšagne'e, na' gote' nono xi'ine' gwnita'.

21 Na' be_{ne}' gwchopa' bošagna'lene' no'ol güezeba', na' lecze gote' nono xi'ine' gwnita'. Lecze ca' goc len be_{ne}' gwyona'.

22 Na' ca' goc gosedaš be_{ne}' gaža' bosošagna'lene' no'ola', na' ne toe' ca gosezoa xi'ine' len le'. Gwde gosat yogo'lol be_{ne}' ca', ca beyožen got len no'ola'.

23 Gož neto', cate' yesyebane' ladjo be_{ne}' guat ca' ¿nox be_{ne}' ca' soalene' no'ola' ca xo'ole'? le yogo' be_{ne}' gaža' bosošagna'lene' le'.

24 Nach Jesúsen' boži'e xtižen', gwne':

—Clelen' chonle xbab dan' žale ca', le bi nezele can' ža Xtiža' Dios da' nyojen, neca nombia'le yela' guac chen'.

25 Cate' yesyeban be_{ne}' guat ca' bich yosošagna' be_{ne}', neca yosonežjo xi'ine' no'ol gwšagne'e, le yesaque' ca angl be_{ne}' zjazoa yaba.

26 Na' ca nac dan' yesyeban be_{ne}' guat ca', ¿biña' gwlable gan' bzoj da' Moisés, can' gož Diosen' le' caten' bol güiže'ne' to lo yag yeše' dao' da' chey? Gože'ne': “Neda' naca' Dios ben' chonxen Abraham, ben' chonxen Isaac, na' ben' chonxen Jacob.”

27 Be_{ne}' guat ca' bi chesonxene' Diosen', san be_{ne}' zjamban. Na' ca nac le'e, leca clelen' chonle xbab.

Da' nac da' žialao da' cheyala' goncho

(Mt. 22:34-40)

28 Leze bžin to be_{ne}' bsed blo'ede' ley dan' bzoj da' Moisés, be_{ne}' bende' caten' chesežeše' len Jesúsen', na' nezde' boži'icze Jesúsen' xtiža'gaquen' binlo. Na' bena' gwñabde'ne':

—¿Non' nacch da' žialao da' zjanyojen da' ža Diosen' cheyała' goncho?

²⁹ Jesúsen' boži'e xtižen' gože'ne':

—Da' nga nacch da' žialao lao yogo'lolen, žan: “Le gwzenag bene' Israel gualaž chia', toze Xancho Dios naque' bene' zaca' gonxencho.

³⁰ Da'n'an' cheyała' gaquecho Xancho Diosen' con ca zelao chejni'icho, do yichj do laže'cho, do fuerz valor checho.” Lenŋa' naquen da' žialao lagüe da' ca' ža Diosen' cheyała' goncho.

³¹ Na' da' gwchopen' zejgalan' ca', gan' žan': “Cheyała' gaque lježcho ca chaque cuincho.” Bich bi de da' že' cheyała' goncho da' zaca'ch ca da' qui.

³² Nach ben' chsed chlo'e dan' bzoj da' Moisésen' gwne':

—Ca'yaŋen' naquen, Maestro. Da' licze can' gw-naon'. Toze Xancho Dios zaque' gonxenchone', na' noch no zoa bene' zaca'ch ca le'.

³³ Na' še gaquecho Dios, con ca zelao chejni'icho, do yichj do laže'cho, do fuerz valor checho, na' gaque lježcho ca chaque cuincho, lenŋa' zaca'chen ca yogo' da' choncho chotcho no beyixe' na' chzey-choba' chonxencho Diosen'.

³⁴ Nach cate' gocbe'e Jesúsen' boži'icze' xtižen' to licha, gože'ne':

—Gague da' xen chyažjen cont nabdo' Diosen' nabi'e yichjlažda'ogon'.

Na' ne yetoe' bich beseyaxjde' bichle yesenabde' Jesúsen'.

*Criston' naque' xi'in diaža che da' rey David
(Mt. 22:41-46; Lc. 20:41-44)*

³⁵ Jesúsen' bsd blo'ede' chyo'o yodaon', gwne':

—¿Nacxechen' be_{ne}' ca' chososed chosolo'e dan' bzoj da' Moisés chesene' Criston' ben' gwlej Diosen' cont yedenabi'e naque xi'in diaža che da' rey David?

³⁶ Cuin Daviden' gwne' can' blo'e Spiritw che Diosen' le':

Xancho Dios gože' Xanan':

“Gwche'edo' cuita' nga nabi'acho txen,

na' gona' cont yogo' no chesegue'e le' yosozexjw yichje' yosozenague' chio'.”

³⁷ ¿Nacxe gac nacho Criston' naque' xi'in diaža che da' David? le' cuin Davin' gože' le': “Xana”.

Na' zjanyanchgua be_{ne}' ca' chosozenag xtižen', na' besyebede' xtižen'.

Jesúsen' bcuiše' be_{ne}' ca' chososed chosolo'e ley dan' bzoj Moisés

(Mt. 23:1-36; Lc. 11:37-54; 20:45-47)

³⁸ Jesúsen' caten' chsed chlo'ede' legaque' gwne':

—Le gwsaca' cont bi gonle can' cheson be_{ne}' ca' chososed chosolo'e dan' bzoj da' Moisés, le chesyebede' chesaše' zjanyaze' lache' ton, na' chesyebede' chesap be_{ne}' legaque' bala'an cate' chesyěžague' lagüe ya'a.

³⁹ Chesyebede' chesebi'e gan' chesebe' be_{ne}' blao cate' chja'aque' yodao' na' cate' chac lni.

⁴⁰ Legaque' chesegue'e yo'o che no'ol güezeb ca', na' cate' chosol güiže' Dios, sša cheso'e diža' cont yesaque be_{ne}' leca chesonxene' Diosen'. Be_{ne}' can' yesacche' castigw clél ca yezica'chle be_{ne}' güen da' xinj.

To no'ol güezebe be'e Diosen' xmechue'

(Lc. 21:1-4)

⁴¹ Na' šlac zoa Jesúsen' chyo'o yodaon', gwchi'e gala'ze gan' xoa caj gan' chesegüe'e mechw che yodaon', na' chne'e can' chesego'o bene' mechw. Na' zan bene' gwñi'a ca' chesegüe'e da' zcha'o mechw.

⁴² Ca' chac, cate' bžin to no'ol güezebe bene' yaše', gwlo'e chop mechw dao' da' bibi zaca'tec.

⁴³ Nach Jesúsen' goxe' bene' ca' zjanaque' le' txen na' gože'ne':

—Da' li žia' le'e, no'ol güezebe yaše' nga ba gwlo'oche' mechw da' zaca'ch len Diosen' clel ca yogo' bene' ca' chesego'o mechw lo' cajen',

⁴⁴ le yogo' legaque' chesegüe'e da' checho'onen lo yela' gwñi'a chegaquen', perw no'ol nga, lo yela' yaše' yela' zi' che' gwlo'e yogo' da' de che' da' chachbanlende'.

13

Jesúsen' gwne' gwžin ža yosyočinje' yodao' blaon'

(Mt. 24:1-2; Lc. 21:5-6)

¹ Cate' cheza' Jesúsen' yodao' blaon' to bene' ca' zjanaque' le' txen gože'ne':

—iMaestro, gwñišc catec xdan zjanac yej qui na' yo'o qui!

² Na' Jesúsen' boži'e xtižen', gože'ne':

—Ca nac yo'o xen qui chle'echo, žin ža cate' ne to yej da' zjancua' nga ca yega'an zjancua' cože' lježen. Yogon' yosyočinje'.

Can' gac cate' ba zoa yeyož yežlion'

(Mt. 24:3-28; Lc. 21:7-24; 17:22-24)

³ Nach ja'aque' Ya'a Olivos gan' nla' yodao' blaon'. Na' cate' ba chi' Jesúsen' lo ya'an len Pedro

na' Jacobo, na' Juan na' Andrés, be_{ne}' ca' zjanaque' le' txen, legaque' gose'ene' šižize:

4 —Che'neto' nao' neto' batcan' gac da' ca'. ¿Nac gac nezeto' cate' ba zoa gac yogo' da' ca'?

5 Jesús'en' boži'e xtižen', gwne':

—Le gwsaca' cont nono siye' le'e.

6 Le be_{ne}' zan yesaš yežlio nga yesaclaže' yosolane' xlatja' nga, yesene': “Nedan' naca' Cristo ben' gwlej Diosen' cont nabi'e.” Na' yeseziye'e be_{ne}' zan.

7 Na' cate' yenele chac gwdile nile nale, o yenele guac gwdile, bi žeble, le can' cheyala' gac. Perw gague lenna' nacho ba bžin ža yeyož yežlion'.

8 Le yesedil to yež len yeto yež yoble na' to naci_{ón} len yeto naci_{ón} yoble, na' zan cuen ga xo'chgua lo yežlion', na' gata' gwbin na' yesebec be_{ne}' žaš. Na' da' qui gac cate' za' solao gata' yela' zi'.

9 Na' le gwsaca' can' gonle, le yesone' le'e lo na' be_{ne}' gwnabia' ca' cont yesot yeseyine' le'e lo' yodao' chegaquen', na' dan' chejnilaže'le neda' nita' be_{ne}' yeseche'exoxje' le'e no lao rey no lao nochle be_{ne}' gwnabia', na' can' güe'lenle legaque' xtižan'.

10 Le za' te che yežlion', xtiža' Diosen' cheyala' gas la_ljen doxen yežlion'.

11 Na' cate' yesezene' le'e na' yeseche'e le'e lao be_{ne}' gwnabia' ca', bi cuen yichjle nac yoži'ile xtiža'gaquen', naca gonlen xbab. San le na con da' ye' Diosen' le'e nale lo hor na'teze, le gague le'eczen' nele, san Spiritw che Diosen' gonen ga nale bin' cheyala' nale.

12 Cana' bal be_{na}ch yesechje' yesone' be_{ne}' biše' golje' lo na' be_{ne}' yesot legaque', na' nita' be_{ne}'

yesone' xi'ingaque' lo na' bene' yesot legacbe', na' nita' bene' yesone xaxne'e lo na' bene' yesot legaque'.

13 Yogo'ze bene' yesegue'ede' le'e dan' chejni-laže'le neda', perw note'tez le'e gwyo gwchejlaže'le cont bi cuejyichjle dan' chejni-laže'le neda' žin žate gatle, nach šjayzoale len Diosen'.

14 'Da' Daniel ben' gwduxjue'ede' xtiza' Dios bzoje' che da' zbanchgua da' gwxinjen latje gan' chonxencho Diosen'. Na' cate' le'e le'ele ba zoa dan' gan' bi cheyalā' soan, cana' bene' yesenita' distritw Judea cheyalā' yosoxnje' šja'aque' do ya'adao'. (Bene' gwlaben' cheyalā' šejni'iden'.)

15 Na' bene' chda do yichjo' che liže' žana', bi yeyetje' yotobe' xšinlaze' ca' že' ližen', con yoxonje'.

16 Na' bene' chda yixe' bi yeyej liže' šjayxi' xalane'.

17 iNyaše' chguaze zjanac no'ol ca' zjanoa' xi'in, na' no'ol ca' ne' chosoguaže' bidao' lo ža ca'!

18 Le nab lao Dios bi yažjen gwxonjle caten' chac zag,

19 le yesaquen ža da' leca yesale' bene'. Cate' bxete Diosen' yežlio na' ža na'aža nono na' gale' ca', neca žinlažen' yesale'de' ca' da' yoble.

20 Na' šaca' Xancho Diosen' bi yozaše' žan' yesac ca', notno yela, perw yozašen' neche chacde' bene' ca' chesejni-laže' le', bene' ba gwleje' zjanaque' xi'ine'.

21 'Cana' še no ye' le'e: "Le na'šč, nga zoa Cristo ben' gwlej Diosen' cont nabi'e", o "Le na'šč, na' zoe", bi šejle'le.

22 Le yesaš bene' gwxiye' bene' yesaclaže' yosolane' xlatja' nga, na' yeson cuine' ca' bene' chesoe' xtiža' Dios. Na' yesone' yela' guac da'

yesele'e bene' na' bichle da' zaca' yesyebande' cont yeseziye'e legaque', na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e legaque'.

²³ Perw ca' nac le'e, le gwzenag, le ba gwduxjue'eda' le'e yogo' can' gac.

Can' gac cate' ben' gwsela' Diosen' golje' beṇaḥ yide' da' yoble

(Mt. 24:29-35, 42-44; Lc. 21:25-36)

²⁴ 'Perw ca' nac ža ca' cate' yeyož gale'le can' gwnia', gwbižen' yeyaquen chol' na' bion' bich gwsenin'.

²⁵ Na' beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'.

²⁶ Nach bene' že' yežlion' yesele'ede' neda' naca' ben' gwsela' Diosen' golja' beṇaḥ za'a ladjo bejon' len yela' guac xen na' yela' bene' zaca' juisyw chian'.

²⁷ Nach sela' angl chian' yosyotobe' yogo' bene' ca' ba gwleja' cont zjanaque' neda' txen gate'teze nite' doxen lo yežlion', ga zelao nac zito'.

²⁸ Le gwzenag che jempl nga che yag yixgüigon': Cate' ba chzolao chebešjw yaguen' na' chelan' laga' che'en' dao', nezele ba za' lagüe ba.

²⁹ Na' lecze cate' le'ele ba chac da' mal ca' ba gwnia', cana'ch nezele ba za' juisyw, ba zoa gala'.

³⁰ Da' li žia' le'e, biṇa' yenit diaža che le'e nita'le na'a cate' yeyož gac yogo'lol' da' ca'.

³¹ Le'e yaban' na' yežlion' yesede' chen, perw ca' nac xtižan', gague da' te cbi gac can' žanna'.

32 'Perw nono ñeze bi ža bi horen' gac ca', ñe angl ca' nita' yaba, ñeca neda' naca' Xi'ñ Diosen' bi ñezda'. Toze Xa' Dios ñeze.

33 'Da'nan', le soa le cueze, le güia le ña', na' le soateze yoĭ güižle Dios, le nono ñeze batcan' žin ža.

34 Naquen ca nac che to bene' šeje' zito', na' cate' za' se'e chon liž xlatje' lo na' bene' güen žin che', cho'e žin da' yeson to toe', na' chzoe' bene' chape' cho'a yo'ona'.

35 Le soa le cueze ca bene' chesape' liže'na', le bi zjanezde' batcan' yela' xan yo'on, še cate' ba zoa gal, še chel, še cate' chbež jea, še cate' ba gwyeni'.

36 Le xož yele'e zejzenez na' yedole'de' legaque' chesetase'.

37 Da' nga žia' le'e leze žiczan' par yogo'lol bene'. Le soa le cuez batcan' žin ža.

14

Bosoxi'e yesezene' Jesúsén'

(Mt. 26:1-5; Lc. 22:1-2; Jn. 11:45-53)

1 Yečhop ža za' gaĭa' pascw na' ĩni dan' chesone' caten' chesagüe' yetextil dan' bibi levadura yo'on. Na' bxoz gwnabia' ca' na' bene' ca' chososed chosolo'e dan' bzoj da' Moisés cheseyiljwlaže' nac yesone' yeseziye'e Jesúsén' cont yesezene'ne' yesote'ne'.

2 Perw gosene':

—Bi senchone' lo ĩnin' cont ca yesebec bene' žaš.

To no'ole bzoe' set zix yichj Jesúsén'

(Mt. 26:6-13; Jn. 12:1-8)

3 Na' goquen' Jesúsén' zoe' Betania liž Simón ben' güe'e yižgüe' da' nzi' lepra. Na' šlac chi' Jesúsén'

cho'a mes, bžin to no'ole noxe' to de yejese ga chož set da' chl'a' zix, naquen dogualje da' bchoj lo yag yej da' nzi' nardo, na' zaca'chguan la'ay. Na' bzoخة' gan' yož seta' na' bzoačhočje' seta' yichj Jesúsen'.

⁴ Na' bal bene' ca' zjanita' na' beseže'e, na' gose' lježe':

—¿Bixchen' benditjde' set zix nga?

⁵ Ša no bete' len güesonen ca no laxjw mos da' gone' gan tgüiz, na' gwnežjuen' gaclenen bene' yaše'.

Na' beseloque' no'ola'.

⁶ Perw Jesúsen' gwne':

—Jayen'. ¿Bixchen' chnele che no'olen'? Dan' bene' len neda' nga naquen güen.

⁷ Le bene' yaše' ca' bate'teze nita'cze' len le'e, na' guaque gonle len legaque' da' güen cate' žan chele, san neda' bich soacza' yessa len le'e.

⁸ No'ole nga bene' da' zelao gwzaque'de'. Ba bguazje' neda' set zix can' cheyala' yesone' len neda' cate' gaša'.

⁹ Da' li žia' le'e, doxen yežlio gate'teze šjasedixjue'e bene' diža' güen dan' chzejni'in chia', decze de šjasyeze'ede' can' ben no'ol nga.

Judas gwčhoglaže' gwdie' Jesúsen' lo na' bene' ca' chesegue'e le'

(Mt. 26:14-16; Lc. 22:3-6)

¹⁰ Nach Judas Iscariote, ben' goque' txen len bene' ca' šižinw ben' gwlej Jesúsen' cont zjanaque' le' txen, gwyeje' jane'e bxož gwnabia' ca' cont yosoxi'e nac gone' gwdie' Jesúsen' lo na'gaque'.

11 Cate' gosende' xtiža' Judasen', besyebede' na' gose'ene' yeso'ene' mechw. Nach Judasen' gwzomagüe' gwdiljwlaže' nac gone' gwdie' Jesúsén' lo na'gaque'.

Xše' dan' gosagüe' len Xançon'

(Mt. 26:17-29; Lc. 22:7-23; Jn. 13:21-30; 1 Co. 11:23-26)

12 Na' bžin ža čala' lni caten' neto' bene' Israel chagwto' yetextil dan' bibi levadura yo'o. Naquen ža nechw che lni pascw cate' chotto' xila' dao', cont šjayza'laže'to' can' bosla Diosen' da' xoxxta'oto' ca' lo na' bene' Egipto ca'. Na' bene' ca' zjanaque' Jesúsén' txen gosenabde' le':

—¿Ga che'ndo' šjasiñi'ato' cont gagwcho xše' che pascon'?

13 Nach gwsele' chop bene' ca' na' gože'ne':

—Le šja'ac ciudan', na' yežagle to bene' byo no'e to che'e nis. Le šejlene',

14 na' gan' yežinen', le ye' xan yo'on: “Maestrona' že': Gonšco' to yo'o gan' gagwto' xše' ža lni nga len bene' ca' zjanaque' neda' txen.”

15 Nach gwlo'ede' le'e to quart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

16 Na' gosa'ac bene' ca' chope, na' besežine' ciudan', na' yogo' can' gož Jesúsén' legaque' goc, na' bososiñi'e xše' že' lñin'.

17 Cate' beyož gwxa gwbiž, bžin Jesúsén' len bene' šižinw ca' gwleje' cont zjanaque' le' txen.

18 Na' gosebi'e gosagüe' xše'. Na' šlac chesagüen', Jesúsén' gože' legaque':

—Da' li' žia' le'e, to le'e chagwle len neda' txen, gwdele neda' lo' na' bene' ca' chesegue'e neda'.

19 Nach legaque' besyeyaše'laže'de' na' gosezo-lagüe' tgüeje' tgüeje' gosenabde' le' gosene':

—¿Nedan' gona' ca'?

Na' yetoe' leze gwne':

—¿Nedan' gona' ca'?

20 Na' Jesús'en' gože'ne':

—Ladjo le'e bene' šižinw, to bene' chagw len neda' txen toze lo' ye'en gon ca'.

21 Na' gac chia' can' nyoj le'e Xtiža' Diosen', neda' naca' ben' gwsela' Diosen' golja' beñach. Perw jnyaše'chguaze nac ben' gwdie' neda' lo' na' bene' ca'! Yejni'acle ša bi goljen'.

22 Na' šlac chesagüe', Jesús'en' gwxi'e to yetex-tilen', na' beyož be'e yela' choxcen che Dios, bzox-jen', na' bnežjuen' legaque', gwne':

—Le gagon'. Lenna' cuerp chia'.

23 Nach beḡue' to vas gan' yože nis uvasen' na' beyož be'e yela' choxcen che Dios, be'en legaque', na' yogüe' gose'eje' late' güej dan' yože lo' vassen'.

24 Na' gože' legaque':

—Da' ngan' xchena' na' chzanlažan' laljen neche yogo'lol beñach. Na' laljen cont solao gac da' coben' da' gwna Diosen' gone' gaclene' beñach.

25 Da' li' žia' le'e, bich ye'eja' xis uvas na'a. Cate'ch žin ža ba zoacho txen gan' chnabia' Diosen', canan' ye'ejan' da' yoble.

*Jesús'en' gwne' Pedroa' bi chebe' naque' le' txen
(Mt. 26:30-35; Lc. 22:31-34; Jn. 13:36-38)*

26 Beyož gosole' gosonxene' Diosen' nach gosa'aque' ja'aque' Ya'a Olivos.

27 Nach Jesúsen' gože'ne':

—Na'aže' yogo'le cuejyichjle neda' neche dan' gac chian'. Le nyojzen le'e Xtiža' Diosen', žan: "Gota' bene' güeyoe xilan' na' xila' ca' yesaslasba'."

28 Perw cate' yosban Diosen' neda' ladjo bene' guat ca', yobch yeya'a Galilea ca le'e.

29 Nach Pedron' gože'ne':

—La' yogo' bene' quinga yesebejyichje' le', neda' bi gona' ca'.

30 Perw Jesúsen' gože'ne':

—Da' li žia le', biņa' cuež jean' chop ni'a na'aže' cate' gac šon ni'a bi chchebo' še nombi'o neda'.

31 Perw Pedroa' do laže' gwne':

—La'czla' še chonen byen guatlencza' le', gwbat nia' bi nombia' le'.

Na' lecze ca' gosena' yogüe'.

Jesúsen' bol güiže' Xe' Dios Getsemaní

(Mt. 26:36-46; Lc. 22:39-46)

32 Nach besežine' latje gan' nzi' Getsemaní, na' Jesúsen' gože' bene' ca' zjanaque' le' txen, gože'ne':

—Ngaze le cue'edo' šlac neda' šjel güiža' Dios.

33 Na' gwche'e Pedro, Jacobo na' Juan, na' gwzolaon da' juisyw da' gocde' lo' yichjlažda'ogüen' na' benchgüe' xbab.

34 Na' gože' legaque':

—Lo' yichjlažda'ogua' nga chacyaše'chgüeda', chacda' gatzca' catequen' chžaglagua'. Nga le yega'an na' le soa le na' txen len neda'.

35 Nach Jesúsen' gwžialagüe' yelate' na' jačhaze' coscho'ale lo yon' gwñabde' Dios še guac ten ca'ale bi gac can' ba zoa gac che'.

36 Gože' Diosen':

—Xa', bibi de da' n̄acho da' bi chac gono'. Benšca cont bi saca'zi'a na' bi yesote'nda', perw bi chn̄aba' gac da' žia' neda', san gac da' n̄ao' le'.

³⁷ Nach beyeje' gan' nita' beñe' ca' šone, na' ble'ede' zjanite' chesetase'. Na' gože' Pedron':

—Simón ¿chtason'? ¿Ne šlož da'oze ca goc cuejo' bišgal len neda'?

³⁸ Bi tasle, san le yol güiž Dios cont bi gon gwxiyen' le'e gan. Da' li lo' yichjlažda'olen' chna'laže'le gonle da' nac binlo, perw cuerp chelen' bi chzoeczen.

³⁹ Nach gwyeje' da' yoble na' bol güiže' Dios na' da' yoble gože'ne' dan' ba gožcze'ne' tñi'a.

⁴⁰ Nach bezyeje' gan' niten', na' da' yoble ble'ede' chesetase', le yejlagüen' chesexa' chesežoden' bišgal. Na' bi besyežellaže' nac yosyoži'e xtižen'.

⁴¹ Na' da' gwyone ni'a gwyeje' na' bezžine' gan' nita' beñe' ca' šone na' gože' legaque':

—¿Ne' chtasle? ¿Ne' chezi'laže'le? Ba goc. Ba gole' gon to beñe' neda' lo na' beñe' güen da' xinj ca', neda' naca' ben' gwseła' Diosen' golja' beñach.

⁴² Le chas, le yeyo'o. Ba za' ben' gon neda' lo na'gaque'.

Gosezene' Jesúsen' cont yeseche'ene' lao beñe' gwnabia' ca'

(Mt. 26:47-56; Lc. 22:47-53; Jn. 18:2-11)

⁴³ Jesúsen' ne' choe'te' dižan' ca' cate' bžin Judas, na' zan beñe' zja'aque' len le' zjanoxe' no yag, no spada, beñe' gosesela' b̄xoz gwnabia' ca' na' beñe' gole' blao ca' chesenabia' nación Israel cheton'. (Judasen' goque' to beñe' šižinw ca' gwlej Jesúsen' cont zjanaque' le' txen.)

44 Na' Judasen' ba gože' legaque' nac yesenezde' non' yesezene', gwne':

—Ben' gwnopa' xague', le'na'; le sene' na' le che'e.

45 Na' cate' bžin Judasen' na' jabigue' gan' zoa Jesúsén' na' gože'ne':

—Maestro, Maestro.

Na' bnope'ne'.

46 Nach gosezene' Jesúsén' cont yeseche'ene'.

47 Perw to ben' zecha cuit Jesúsén' gwlej spada chen' na' gwdinen' mos che bχoz blaon' gwchogte' šla'a naguen'.

48 Nach Jesúsén' gože' beņe' ca':

—¿Nonle neda' ca to beņe' gwban za'acle zedexi'le neda' len spada na' len yag?

49 Yogo' žaze gwzoo' len le'e bsd blo'eda' beņe' chyo'o yodao' blaon', na' bi gwzenle neda'. Perw chac da' qui cont chac can' nyoj Xtiža' Diosén'.

50 Nach yogo' beņe' ca' zjanaque' Jesúsén' txen bosoxonje' gosebejyichje'ne'.

Bi' güego' bin' boxonj

51 Na' to bi' güego' na'obe' Jesúsén', na' nχoa cože'be' toze sábara. Na' beņe' ca' ba gosezene' Jesúsén' lecze gosenize'be'.

52 Perw gwlejyichje' sábaran' na' boxonjbe' ga'alyidbe'.

Goseche'e Jesúsén' lao beņe ca' chesenabia' nación Israelén'

(Mt. 26:57-68; Lc. 22:54-55, 63-71; Jn. 18:12-14, 19-24)

53 Nach goseche'e Jesúsén' lao bχoz blaon', na' besežag yogo' beņe' ca' zjanac bχoz gwnabia', na'

be_{ne}' gole blao ca' chesenabi'e naci_{ón} c_heton' na' be_{ne}' ca' bososed bosolo'ede' dan' bzoj da' Moisés.

54 Na' Pedron' na'ogüe' Jesúsen' zito' zito'le bžintie' liž b_xoz blaon' na' gwyo'e chy'o'ona' gwchi'e txen len be_{ne}' ca' chesape' yodao' blaon' boše'e cuine' cho'a yi'.

55 Na' ca' nac b_xoz blaon' na' yogo' be_{ne}' ca' chesenabia' naci_{ón} c_heton', besyeyiljwlaže' bi da' yesagüe' xya c_he Jesúsen' cont yesote'ne', perw bi besyeželden'.

56 Na' zan be_{ne}' gosone' diža' güenlaže' c_he Jesúsen', perw bi gosene' toz ca' yesene'.

57 Ba_{le}' gosezože'e na' bososbague'ne' xya c_hol, gosene':

58 —Neto' beneto' gwne': “Neda' yochinja' yodao' nga da' ben be_{na}ch, na' šone žaze yeyona' yeto yodao' da' bi gon be_{na}ch.”

59 Perw ne' ca' ca' gosene' toz ca' yesene'.

60 Nach b_xoz blaon' gwzože'e ladjo yogo'lo_{le}' na' gw_nabde' Jesúsen':

—¿Bi choži'o xtižen'? ¿Bi dan' chosožie' le' xya?

61 Perw Jesúsen' bitw bi gwne', bitw boži'e xtižen'. Na' b_xoz blaon' da' yoble gw_nabde' le', gwne':

—¿Naco' le' Cristo ben' gwlej Diosen' cont nabi'e, na' Xi'in Dios ben' chonxencho?

62 Jesúsen' gože'ne':

—Le can' naca'. Na' le'ele neda' cate' ba chi'a šla'a liča c_he Dios ben' nac la'zelagüe be_{ne}' gwnabia', neda' naca' ben' gwsele' golja' be_{na}ch. Na' le'ele yetja' ladjo bejw dan' ze le'e yaban'.

63 Nach b_xoz blaon' gwcheza' xa_lane' cont nacia' bi beque'e can' gwna Jesúsen', na' gwne':

—Noch no chyažje bene' co' da' bali.

⁶⁴ Le'e ba benele chne' che Dios dan' že' ca', chon cuine' ca Dios. ¿Nacxe ža le'e?

Na' yogüe' gosene' nape' doła' na' cheyała' gate'.

⁶⁵ Nach bale' gosezolagüe' chosoži'ene' xene' na' bososeyjue' lagüen' len to lache' na' gosot goseyine' le', na' gosonle' che' gose'ene':

—jGwnašč non' chot le'!

Na' bene' ca' chesape' yodao' blaon' gosot goseyine' le'.

Pedron' bi gwchebe' še nombi'e Jesús'en'

(Mt. 26:69-75; Lc. 22:56-62; Jn. 18:15-18, 25-29)

⁶⁶ Pedron' chi'e chyo'o che'e'elele, cate' bžin to no'ole güen žin che bžoz blaon'.

⁶⁷ Na' cate' no'olen' ble'ede' le' chi'e choše'e cuine' cho'a yin', gwne'e le' na' gože'ne':

—Lencze le' naco' txen len Jesús bene' Nazaret.

⁶⁸ Perw Pedron' bi gwchebe', gwne':

—Bi nombi'ane', neca nezda' bin' žo'.

Na' beyej Pedron' jayzie' cho'a puert na'le. Nach gwchež to jea.

⁶⁹ Na' no'ol güen žinna' gwne'e le' da' yoble na' gože' bene' ca' nita' na':

—Benga naque' legaque' txen.

⁷⁰ Perw le' da' yoble bi gwchebe' še naque' txen len Jesús'en'. Na' gocze štit da' yoble bene' ca' nita' na' gose'e Pedron':

—Da' licze, le' naco' txen len legaque', le naco' bene' Galilea, nachia' chnio' can' chesene bene' Galilea ca'.

⁷¹ Nach Pedron' chop šone ni'a gwne':

—Diosen' gone' neda' castigw še chonlaža' žia' bi nombi'a bena'.

⁷² Na' cate la' gwchežte jean' da' gwchope. Nach jayze'e Pedron' can' gož Jesúsen' le': “Bina' cuež jean' chop ni'a cate' gac šon ni'a bi chebo' še nombi'o neda'.” Na' cate' jayze'ede' can' gož Jesúsen' le', na' gwcheže'.

15

Goseche'e Jesúsen' lao Pilato

(Mt. 27:1-2, 11-14; Lc. 23:1-5; Jn. 18:28-38)

¹ Ca gwyeni', b_xoz gwnabia' ca' besežague' len be_{ne}' gole blao ca' chesenabi'e naci_{on} cheton' na' len be_{ne}' ca' chososed chosolo'e dan' bzoj da' Moisés na' len yezica'chle be_{ne}' gwnabia' ca'. Na' bosocheje' Jesúsen' na' goseche'ene' jasesane'ne' lo na' Pilato ben' nac gobernador.

² Pilaton' gw_nabde'ne', gože'ne':

—¿Len' naco' rey che be_{ne}' Israel?

Jesúsen' boži'e xtižen', gwne':

—Can' gwnao'na', can' naquen.

³ Na' b_xoz gwnabia' ca' da' zan da' bosocuiše'ne'.

⁴ Nach Pilaton' da' yoble gw_nabde'ne', gože'ne':

—¿Bi choži'o xtiža'gaquen'? le da' zan da' chosocuiše' le'.

⁵ Perw Jesúsen' bitw bi gwne'. Na' Pilaton' bebande' che'.

Gosechogbi'en gat Jesúsen'

(Mt. 27:15-31; Lc. 23:13-25; Jn. 18:38-19:16)

⁶ Na' gota' costumbr, Pilaton' gwsane' to be_{ne}' de ližya caten' čala' lni pascw che neto' be_{ne}' Israel, con to be_{ne}' yesenab be_{ne}' gualaž cheton'.

7 To be_{ne}' lie' Barrabás na' len ye_{xonj} bene' gosot be_{ne}' cate' besyedabague' gobiern_{na}' zjajo'e lo' ližya len nochle be_{ne}' güen da' mal.

8 Nach besežag be_{ne}' na' gose_{ñabde}' Pilaton' gwsane' to be_{ne}' con can' nac costumbr čhegaquen'.

9 Na' Pilaton' boži'e xtiža'gaquen' gwne':

—¿Chaclaže'le gwsana' rey čhe le'e nacle be_{ne}' Israel?

10 Gwne' ca' le gočbe'ede' dan' chesacxi'a b_{xoz} gwnabi'a ca' Jesúsen', da'nan' bosodie' le' lo ne'e.

11 Perw b_{xoz} gwnabia' ca' bosota bosone' be_{ne}' ca' že' na' cont gose_{ñabe}' gwsane' Barrabás ben' de ližyan'.

12 Nach Pilaton' gw_{ñabde}' legaque':

—¿Bixe gona' len ben' žale nac rey čhe le'e nacle be_{ne}' Israel?

13 Legaque' bososya'adie' bosyoži'e xtižen':

—¡Bde'e le'e yag cruz!

14 Pilaton' gože' legaque':

—¿Bixe da' xinj nonen'?

Nach legaque' da' yoble bososya'achgüe' gosene':

—¡Bde'e le'e yag cruz!

15 Nach Pilaton', cont bega'ane' güen len be_{ne}' ca', bsane' Barrabásen' can' gose_{ñabe}'. Na' bene' mandadw gosot goseyin soldadw čhe' ca' Jesúsen', nach be_{ne}' le' lo na'gaque' cont yosode'ene' le'e yag cruz.

16 Nach soldadw ca' goseče'ene' yeto latje dan' zoa chyo'o čhe liž be_{ne}' gwnabian', na' bosotobe' yogo' soldadw ca', zjanac zane'.

17 Gosečhize' Jesúsen' to lache' moradw, na' gosone' to corona de xis yeše' bosozoen' yichjen'.

18 Na' gosezola_güe' cheson_le' che', chesosye'e:
—¡Viva, rey che be_ne' Israel!

19 Na' bosozete' yichjen' xis, bosoži'ene' xene', na' bosozoa xibe' gosone' ca be_ne' chesonxen le'.

20 Beyož goson_le' che', besyeyi_ne' lache' moradon' na' bosyoguacue'ne' xacze'. Nach gose_{ch}e'ene' cont jasede'ene' le'e yag cruz.

Bosode'ene' le'e yag cruz

(Mt. 27:32-44; Lc. 23:26-43; Jn. 19:17-27)

21 Na' šlac zjan_{ch}e'ene' gan' yesote'ne' besyežague' to be_ne' yež Cirene le' Simón, xa Alejandro na' Rufo, za' zeze'e yi_xe', na' bosogüe'ene' yag cruz che Jesús_n'.

22 Gose_{ch}e' e Jesús_n' latje ga nzi' Gólgota, zeje dižan' Latje che Žit Yichj Be_ne' Guat.

23 Na' goso'ene' vino da' n_{ch}i_xe to nechw da' nzi' mirra, perw Jesús_n' bi goclaže' ye'ejen'.

24 Nach bosode'ene' le'e yag cruz_n'. Na' soldadw ca' gosone' rifa cate' besye_le' e xa_lana' Jesús_n' cont bla' bi besyeche_l to toe'.

25 Cheda ga šezille caten' bosode'ene' le'e yag cruz.

26 Na' yichj yag cruz_n' bosozoe' dan' bosozoje' choen' diža' bix_{ch}en' gosote'ne'. Qui nyojen, žan: “Rey che Be_ne' Israel.”

27 Txen len Jesús_n' lecze bosode' e le'e yag cruz ye_{ch}ope be_ne' gwban, toe' šla'a licha, na' yetoe' šla'a robes.

28 Na' da' gosone' ca', goc ca' nyoj Xtiža' Diosen', žan: “Gosone'ne' ca be_ne' güen da' xi_nj.”

29 Na' be_ne' gosede ga_la'ze gosezi'diže'ne', con chosota yichje' gosene':

—Le' gwnao' yo_{ch}in_{jo}' yodaon' na' šone žaze yey-
ontion'.

³⁰ Bosla cuino' na' beyetj le'e yag cruza'.

³¹ Lecze ca' b_xoz gwnabia' ca' na' be_{ne}'
ca' bososed bosolo'e dan' bzoj da' Moisés
gosezi'diže'ne', na' gose' lježe':

—Bosle' be_{ne}' yoble, perw bi chac yosla cuine'.

³² Le'echone' yeyetje' na'a le'e yag cruzen', nach
šejle'cho naque' Cristo ben' gwlej Diosen' cont
nabi'e chio' be_{ne}' Israel.

Na' lente be_{ne}' ca' bosoda'lene' le' le'e yag cruz
ca' gosezi'diže'ne'.

Can' goc caten' got Jesúsen'

(Mt. 27:45-56; Lc. 23:44-49; Jn. 19:28-30)

³³ Cate' bžin guagwbiž, doxen yežlion' goc chol,
bžinte cheda šone.

³⁴ Na' ca hora' Jesúsen' gw_{ne}' zižje gwne':

—Eloi, Eloi ĵlama sabactani? —zeje diža': Dios
ĉhia', Dios ĉhia', ĵbixĉhen' ba gwlejiyĉhjo' neda'?

³⁵ Na' ba_l be_{ne}' ca' zjanita' na' gosende' na'
gosene':

—Le gwzenag, chol_l güiže' da' Elías, ben' be' xtiža'
Dios cani'.

³⁶ Nach to be_{ne}' ca' gwyejsese' na' bzažede' to
esponja vino zĉh_j na' bzoen' to lao xis to_{ne} nach
jažiguen' cho'a Jesúsen' cont xopen', na' gwne':

—Cuezcho, yešque güid Elíasen' yeletje' le'.

³⁷ Nach Jesúsen' bosye'e zižje, na' gote'.

³⁸ Na' lache' da' ze lo' yodao' blaon' bcheza'
gacholen, gwza'te yiĉhjen bžinte che'e_{le}.

³⁹ Na' xan soldadw ca' zie' lao Jesúsen', na' cate'
bende' can' bosye'en na' ble'ede' can' goten', gwne':

—Da' li le bengan' goc dogualje Xi'in Dios.

40 Lece bal no'ole zjanite' zito'le chesene'e. Na' len legaque' zjanita' María no'ole Magdala, na' Sa-lomé, na' María xna' Jacobo bene' naše'te, na' lece goque' xna' José.

41 No'ol qui gosa'ogüe' Jesúsen' na' gosaclene' le' cate' chsed chlo'ede' bene' ca' že' distritw Galilea. Na' yezanch no'ol zjanita' na', bene' ja'aclene' le' txen Jerusalén.

Bosocuaše' Jesúsen'

(Mt. 27:57-61; Lc. 23:50-56; Jn. 19:38-42)

42 Žana' goquen žan' bososini'e par ža che Dios cate' bi de lsens yesone' žin. Na' cate' ba chxoa gwbiž,

43 to bene' le' José, bene' ciuda Arimatea, beyaxjde' gwyeje' lao Pilaton' na' jaynabe' cuerp che Jesúsen'. José goque' to bene' zaque' lao bene' ca' gosenabi'e nación Israel cheton', na' ba zoe' chbeze' batcan' solao nabia' ben' sela' Diosen'.

44 Pilaton' bebande' dan' ba gote', na' goxe' xan soldadw ca' cont gwnabde' le' še da' li ba gote'.

45 Na' cate' xan soldadw ca' gože' le' le can' ba goc, Pilaton' bnežjue' latje beyoa' Josén' cuerp che' Jesúsen'.

46 Nach Josén' gwzi'e to lache' xen, beletje' cuerp che Jesúsen' na' bolažen' len. Na' la' jaselo'ote' le' to lo' bloj da' nche'ene' le'e yej xen, na' blole' to yej cho'a blojen' cont bseyjon len.

47 Na' María no'ole Magdalan' len María xna' Josén' besele'ede' gan' bosocuaše'nen'.

16

Beban Jesúsen' ladjo bene' guat ca'
(Mt. 28:1-10; Lc. 24:1-12; Jn. 20:1-10)

¹ Cate' gwde ža che Diosen', María no'ole Magdalan', María xna' Jacobo, na' Salomé gosezi'e da' chla' zix cont šjaselo'en cuerp che Jesúsen'.

² Na' šezildao' ža dmigw besežine' cho'a ban', cate' za' chla' gwbiž.

³ Na' za' yesežine' gose' lježe':

—¿Noxe ca'a yej xen dan' da' cho'a blojen'?

⁴ Perw cate' besežine' na' goseŋe'e, besele'ede' yej xen dan' da' cho'a blojen' ba bga'an.

⁵ Nach goso'e lo' blojen', na' besele'ede' chi' to bene' xcuide' šla'a licha, nyaze' to lache' toŋ da' šiš. Na' besežebe'.

⁶ Na' bena' gože'ne':

—Bitw žeble. Cheyiljwle Jesús bene' Nazaret ben' bosode'e le'e yag cruz. Perw ba bebane'; notoch no nla' nga. Le na' gan' gosexoe'ne'.

⁷ Le šjaya'ac na' le ye' bene' ca' gosaque' le' txen, na' len Pedron', gwyobech Jesúsen' yežine' Galilea clel ca' legaque'. Na' Galilean' na' yesele'ede'ne' can' gwnacze'.

⁸ Nach no'ol ca' chosyoxonjsese' besyeya'aque' cho'a blojen', le chesexiztite' besežebe'. Na' notno gose'e ca', le besexožde'.

Jesúsen' blo'elagüe' María no'ole Magdala
(Jn. 20:11-18)

⁹ Beyož beban Jesúsen' ladjo bene' guat ca' šezildao' ža dmigw, Jesúsen' blo'elagüe' da' nechw len María no'ole Magdalan', ben' bebeje' gaž da' xigüe' yo'o nyaze'.

10 Na' María nga jatixjue'ede' bene' ca' ba gosenita' len le'. Zjanita'yaše' na' chesebeže' cate' bžine'.

11 Na' cate' gosende' be'e diža' mban Jesúsen' na' gosende' be'e dižan' can' ba ble'ede'ne', bi gosejle'e.

Jesúsen' blo'elagüe' len chop bene' ca' gosaque' le' txen

(Lc. 24:13-35)

12 Beyož goc ca', chop bene' ca' gosaque' Jesúsen' txen zjangüe'e nez yixe' cate' Jesúsen' blo'elagüe' legaque', na' nža'le besele'ede'ne'.

13 Lecze legaque' ja'aque' jasedixjue'ede' bene' yezica'chle, perw neca gosejle'e chegaque'.

Da' bgon Jesúsen' yeson bene' ca' chsejnilaže'ne' (Mt. 28:16-20; Lc. 24:36-49; Jn. 20:19-23)

14 Gwdena' bene' šnej ca' gwlej Jesúsen' cont zjanaque' le' txen zjachi'e cho'a mes chesagüe' cate' blo'elagüe' len legaque'. Na' gwdile' legaque' da' bi chesejnilaže' le' do yichj do laže' na' zjanaque' laždao' chach, le bi gosejle'e che bene' ca' besele'ede'ne' ba bebane' ladjo bene' guat ca'.

15 Na' gože' legaque':

—Le šja'ac doxen yežlio, na' le šjatixjue'e diža' güen chia' len yogo'lol bene'.

16 Bene' ca' yesejnilaže' neda' na' yesezoe' nis, gata' yela' mban chegaque' toli tocanē. Perw bene' bi chesejnilaže' neda', yesebiaye'e.

17 Na' bene' ca' chesejnilaže' neda', yesyega'anlene' da' qui: Yeso'e la' na' yesyebeje' da' xigüe' yo'o nyaz bene'; yesenie' diža' cobe da' bi zjansede';

¹⁸ na' še yeso_xe' no be_l znia, o še yese'eje' da' nac venen, bibi yesacde'; na' lecze yesexoa taque' yichj be_{ne}' chese'e na' yesyeyacde'.

Begüe Jesúsén' yaba

(Lc. 24:50-53)

¹⁹ Beyož bšaljlene' legaque', Xancho Jesúsén' begüe' yaba, na' gwchi'e cuit Diosen' šla'a licha.

²⁰ Na' be_{ne}' ca' zjanaque' le' txen besežaše' na' jasedixjue'ede' diža' güen che' doxen. Na' cuin Xancho Jesúsén' goclene' legaque' gosone' yela' guac cont gosejle' be_{ne}' le' nac da' li dižan' goso'en. Da' na'zen' chzoja'.

**Diža' güen che ancho Jesucristo
New Testament in Zapotec, Zoogocho
(MX:zpq:Zapotec, Zoogocho)**

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
de7d40fb-3909-53d8-8bea-744cf1ce0e41